

# আহমদীয়াত

বিশ্বকে কি দিচ্ছে?

## What has Ahmadiyyat given to the World?

Full text of a speech delivered by Maulana Ataul Mujeeb Rashed Sahib, Imam of the Fazl Mosque, London at the 37th Jalsa Salana (Annual Gathering) of UK held on 25-27 July 2003.

Translated into Bengali  
by  
Alhaj Mohammad Mutiur Rahman

মাওলানা আতাউল মুজীব রাশেদ  
ইমাম, ফযল মসজিদ, লন্ডন

بِسْمِ اللَّهِ الرَّحْمَنِ الرَّحِيمِ

# আহমদীয়াত বিশ্বকে কি দিয়েছে?

মাওলানা আতাউল মুজীব রাশেদ  
ইমাম, ফযল মসজিদ, লন্ডন

প্রকাশনায়  
নাযারত, নশর ও এশায়াত, কাদিয়ান, ভারত

আহমদীয়াত নে দুনিয়া কো কিয়া দিয়া?  
(আহমদীয়াত বিশ্বকে কি দিয়েছে?)  
বাংলা অনুবাদ : আলহাজ্জ মোহাম্মদ মুতিউর রহমান

প্রথম বাংলা সংস্করণ : জুলাই ২০০৬  
বর্তমান বাংলা সংস্করণ : ২০১৬ (ভারত)  
প্রকাশক : নাজারত নশর ও এশায়াত, কাদিয়ান  
গুরুদাসপুর, পাঞ্জাব, ভারত  
মুদ্রণ : ফজল-এ- উমর প্রিন্টিং প্রেস, কাদিয়ান

---

BOOK : WHAT HAS AHMADIYYAT GIVEN TO THE WORLD  
TRANSLATED INTO  
BENGALI : ALHAZ MUHAMMAD MOTIUR RAHMAN  
SECOND EDITION : 2016  
PUBLISHED BY : NAZARAT NASHAR-O-ISAAT, QADIAN,  
GURDASPUR, PUNJAB, INDIA  
PRINTED AT : FAZLE UMAR PRINTING PRESS, QADIAN,  
GURDASPUR, PUNJAB, INDIA

بِسْمِ اللَّهِ الرَّحْمَنِ الرَّحِيمِ

## ভূমিকা

২০০৩ সালে বৃটেনের ৩৭তম বার্ষিক জলসায় লন্ডনে অবস্থিত মসজিদ ফযল- এর ইমাম জনাব আতাউল মুজীব রাশিদ সাহেব ‘আহমদীয়াত নে দুনিয়া কো কিয়া দিয়া’ এই বিষয়ে উর্দুভাষায় এক হৃদয়গ্রাহী বক্তব্য উপস্থাপন করেন, যা পরবর্তীকালে উর্দু মুখপত্র দৈনিক ‘আল্ ফযল ইন্টারন্যাশনাল’ এর ২৮-১১-২০০৩ এবং ১২-১২-২০০৩ তারিখের সংখ্যায় প্রকাশিত হয়। আলহাজ্জ মোহাম্মদ মুতিউর রহমান সাহেবের প্রচেষ্টাতে সেটি বাংলা ভাষায় অনূদিত হয়, যা দুই বাংলার দুই মুখপত্র যথাক্রমে পাক্ষিক ‘আহমদী’ এবং মাসিক ‘আলবুশরা’-তে ধারাবাহিকভাবে প্রকাশিত হয়।

পুস্তিকাটির গুরুত্ব অনুধাবন করে বাংলাভাষী মানুষের কাছে আহমদীয়াত তথা সত্য ইসলামকে উপস্থাপনের লক্ষ্যে নাজারাত নশর ও এশায়াত কাদিয়ান, ভারত আল্লাহতা’লার অপার অনুগ্রহে পুস্তিকাটির পুনঃপ্রকাশ করছে।

পুস্তিকাটি প্রকাশে অনুবাদক সহ যারা যেভাবে সংশ্লিষ্ট আল্লাহতা’লা তাদের সকলকে উত্তম পুরস্কার প্রদান করুন। আশা করি পুস্তিকাটি বাংলাভাষী পাঠকদের কাছে আহমদীয়া মুসলিম জামাত সম্পর্কে আরো সুস্পষ্ট ধারণা পরিবেশন করে সমাদৃত হবে।

সেখ মোহাম্মদ আলী  
সদর, এশায়াত কমিটি, পঃ বঙ্গ

## দুটি কথা

তবলীগি প্রচার কার্যের সময় অনেকে দায়ীইলাল্লাহগণকে (আল্লাহর দিকে আশ্রানকারীদের) এ প্রশ্ন করে থাকেন যে, আমাদের অবগত করান যে, “আহমদীয়াত বিশ্বকে কি দিয়েছে”?

এ সম্পর্কে যুক্তরাজ্যের আহমদীয়া জামাত ৩৭তম বাৎসরিক জলসায় মসজিদ ফযল লণ্ডনের ইমাম মওলানা আতাউল মুজীব সাহেব রাশিদ, একটি বক্তব্য প্রদান করেছেন। যেখানে তিনি সংক্ষিপ্তাকারে কিন্তু সুস্পষ্টভাবে এ বিষয়টির পর্যালোচনা করেছেন। বিষয়টির গুরুত্বকে অনুধাবন করে এ বক্তব্যটি ভারতের নব দীক্ষিত এবং আহমদীয়াত সম্পর্কে গবেষকদের জ্ঞানের পরিপূর্ণতার স্বার্থে প্রবন্ধটিকে নাজারাত নশর ও এশায়াত বিভাগের পক্ষ হতে সম্মানীয় মওলানা সাহেবের অনুমতিক্রমে প্রকাশ করা হচ্ছে। আল্লাহতা’লা করুন যেন এই পুস্তিকাটির প্রকাশ সার্বিকভাবে পুণ্যাত্মাগণের জন্য কল্যাণময় হয়ে ওঠে। আমীন।

নাযির, নশর ও এশায়াত কাদিয়ান

## মুখবন্ধ

যুক্তরাজ্যের জামাত আহমদীয়ার ৩৭তম বাৎসরিক জলসা ২০০৩ সালের ২৫, ২৬ ও ২৭শে জুলাই ইসলামাবাদে (টিলফোর্ড, সারে) অনুষ্ঠিত হয়। এই জলসার এরূপ বিশেষত্ব ছিল যে, পঞ্চম খিলাফতকালে ইউ. কে-তে অনুষ্ঠিত এটি প্রথম জলসা ছিল এবং এ দিক থেকেও এটি প্রথম বাৎসরিক জলসা ছিল যেখানে সৈয়দনা হজরত আমিরুল মো'মিনিন মির্যা মাসরুর আহমদ খলিফাতুল মসীহ পঞ্চম (আইঃ) যুগ খলিফারূপে অংশ গ্রহণ করেন। তাঁর সংক্ষিপ্ত অথচ তাৎপর্যপূর্ণ ও হৃদয়ে ঈমান উদ্দীপনা সৃষ্টিকারী বক্তৃতাসমূহ জলসায় উপস্থিতগণের জন্য জ্ঞান ও বিশ্বাসের পরিপূর্ণতার কারণ সাব্যস্ত হয়েছে। আল্লাহতা'লাকে অশেষ অশেষ ধন্যবাদ।

এই ঐতিহাসিক জলসায় এ অধমের সৌভাগ্য হয়েছিল “আহমদীয়াত এ বিশ্বকে কি দিয়েছে”? বিষয়টি উপর বক্তব্য প্রদান করা। বক্তব্য তৈরীর পূর্বে আমি অভ্যাসমত হুজুর (আইঃ) এর নিকট বিশেষ দোয়ার আবেদন জানালে হুজুর (আইঃ) অনুগ্রহ পূর্বক উত্তর লেখেন:

“আপনার পত্র পেয়েছি। আল্লাহতা'লা আপনাকে আপনার বক্তব্যের জন্য উত্তম উপায়ে প্রস্তুতির সৌভাগ্য দান করুন। আপনার বুদ্ধিমত্তার বিকাশ দান করুন এবং ভাষার জড়তা দূর করে দিন।

رَبِّ اشْرَحْ لِي صَدْرِي ۝ وَيَسِّرْ لِي أَمْرِي ۝

রাব্বিশ রাহ্লি সাদরি ওয়া ইয়াস্‌সারলি আমরি  
(সূরা ত্বাহা : ২৬-২৭)

(হে আল্লাহ আমার হৃদয়কে উন্মুক্ত কর এবং বিষয়াদি সহজসাধ্য করে তোল) এই দোয়া পাঠ করতে থাকুন এবং বক্তৃতা তৈরী করতে শুরু করে দিন। আল্লাহতা'লা অনুগ্রহ করুন এবং আপনার সহায় হোন।”

সমস্ত প্রশংসা আল্লাহতা'লার। এই দোয়া সমূহের কল্যাণে প্রতিটি পর্বে আল্লাহতা'লা আমাকে পথ-প্রদর্শন করেছেন এবং সাহায্যকারী হয়েছেন। আলহামদুলিল্লাহ্‌ আলা যালিক।

বিষয়টির গুরুত্ব এবং প্রবন্ধটি থেকে অধিকতর উপকৃত হওয়ার বিষয়টি পর্যালোচনা করে অনেকে এই ইচ্ছা এই বক্তৃতাটিকে পুস্তিকাকারে প্রকাশ করা খুব যুক্তি-যুক্ত হবে। সেই মত আমি এই প্রবন্ধটির পর্যালোচনাও করি এবং প্রয়োজনীয় কিছু বর্ধিতকরণের সাথে এখন এটি জামাতের বন্ধুদের নিকট উপস্থাপন করছি।

আল্লাহতা'লার নিকট দোয়া করি যেন তিনি এই প্রচেষ্টাকে কবুলিয়তের মর্যাদা দান করেন এবং এই পুস্তিকাটির প্রকাশনা সার্বিকভাবে অনেক লাভজনক এবং কল্যাণময় সাব্যস্ত হয়। আল্লাহ করুন যেন পুস্তিকাটি অআহমদী বন্ধুদের জন্য শান্তি ও প্রশান্তির কারণ হয়ে ওঠে এবং তাদের সত্য গ্রহণের সৌভাগ্য প্রদান করে। আমীন।

পুস্তিকাটির প্রকাশনায় জনাব ওয়াসিম আহমদ তাহের এবং স্নেহের বেলাল আহমদ ওয়াসিম আমাকে সাহায্য করেছেন। আল্লাহতা'লা তাদেরকে এর উত্তম প্রতিদানে ভূষিত করুন। আমীন।

লণ্ডন, ১৪ই আগষ্ট ২০০৩

খাকসার  
আতাউল মুজিব রাশিদ  
ইমাম, মসজিদ ফযল, লণ্ডন

# সূচীপত্র

ক্রমিক নং	বিষয়	পৃষ্ঠা নং
১।	আহমদীয়াত কি?	৬
২।	জীবিত খোদা দান করেছে	১২
৩।	প্রকৃত ইসলাম	১৬
৪।	পবিত্র ইসলামী সমাজ	১৭
৪।	পবিত্র পরিবর্তন	১৯
৬।	খিলাফতে আহমদীয়া পুরস্কার	২২
৭।	জামাতের সংগঠন বা ব্যবস্থাপনা	২৫
৮।	মতভেদপূর্ণ মসলাগুলোর সঠিক মীমাংসা	২৬
৯।	হযরত ঈসা (আঃ) এর মৃত্যু	২৭
১০।	খতমে নবুওয়তের প্রকৃত তাৎপর্য	২৮
১১।	কুরআন মজীদের উচ্চ মর্যাদা	২৯
১২।	রুহানী খাযায়েন (আধ্যাত্মিক ভাণ্ডার)	৩২
১৩।	সেবার ক্ষেত্রে উৎসাহব্যঞ্জক কর্মকাণ্ড	৩৪
১৪।	নিঃস্বার্থ জনসেবা	৩৬
১৫।	এম টি এ (ইন্টারন্যাশনাল)	৩৮
১৬।	আর্থিক কুরবানী	৪০
১৭।	সন্তান-সন্ততির কুরবানী	৪৩
১৮।	কুরবানীর ব্যাপক ক্ষেত্র	৪৫
১৯।	ইসলামের তবলীগের উদ্দীপনা ও কুরবানী	৪৭
২০।	দোয়ার গ্রহণীয়তার তত্ত্বজ্ঞান ও অভিজ্ঞতা	৫০
২১।	শেষ কথা	৫৪

# আহ্মদীয়াত বিশ্বকে কি দিয়েছে?

هُوَ الَّذِي أَرْسَلَ رَسُولَهُ بِالْهُدَىٰ وَدِينِ الْحَقِّ لِيُظَاهِرَهُ عَلَى الَّذِينَ كَفَرُوا وَلِيُذَكِّرَ الَّذِينَ لَمْ يَرْكَبُوا

অর্থাৎ তিনিই নিজ রসূলকে হেদায়াত ও সত্যধর্ম সহকারে পাঠিয়েছেন যেন তিনি একে সব ধর্মের ওপর বিজয়ী করে দেন। আর মুশরিকরা যতই অপছন্দ করুক না কেন (সূরা সাফ্ফ : ১০)।

এ বিষয়টি প্রকৃতপক্ষে অ-আহ্মদী বন্ধুদের পক্ষ থেকে একটি প্রশ্নের আকারে উঠানো হয়ে থাকে। এ প্রশ্নে বিস্ময়, অনুসন্ধানের বিষয় এবং জিজ্ঞাস্য লুপ্ত অভিযোগ রয়েছে। মুসলমান তো সাধারণভাবে এ দিক থেকে এই প্রশ্ন উল্লেখ করেন, আমাদের ধর্ম ইসলাম তো সবদিক থেকে পরিপূর্ণ। এ পরিপূর্ণ ধর্মের পরে আহ্মদীয়াত আমাদের কিভাবে আরও কিছু দিতে পারে? এটা যদি বলা হয়, আহ্মদীয়াত বিশ্বকে নতুন কিছু দেয় নি, কেবল ইসলামের বাণীই দিয়েছে তাহলে পরে তাদের উত্তর এই, আমাদের জন্যে ইসলামই যথেষ্ট। আমাদের আহ্মদীয়াতের প্রয়োজন নেই। আর অমুসলিম বন্ধুরা এটা জানতে চান, পরিশেষে ইসলাম ও আহ্মদীয়াতের সাথে পার্থক্য কি আর ইসলাম থেকে সরে গিয়ে আহ্মদীয়াত নতুন কি উপস্থাপন করেছে যার ওপর আমাদের গভীরভাবে চিন্তা করতে হবে? এ দ্বিমুখী প্রশ্নের বিস্তারিত উত্তর দিতে আশা রাখি। সময়ের দিকে লক্ষ্য রেখে এটাই বিস্তারিতভাবে বর্ণনা করবো। প্রকৃতপক্ষে আল্লাহুতাআলার কাছ থেকেই সৌভাগ্য লাভ হয়ে থাকে।

## আহ্মদীয়াত কী?

ইসলামের নবজীবন ও বিশ্ব বিজয়ের লক্ষ্যে বিশ্বব্যাপী একটি আন্দোলন হলো আহ্মদীয়াত। আল্লাহুতাআলার সম্মতি ও তাঁর সমর্থনে এটা প্রবর্তন করা হয়েছে। আহ্মদীয়াত সেই চারাগাছ যার প্রকৃত মালিক নিজ হাতে এটি রোপণ করেছেন। তিনি স্বয়ং এতে পানি সিঞ্চন করেন ও সুরক্ষা করেন। সেই চিরস্থায়ী ও সর্বশক্তিমান খোদার প্রতিশ্রুতি রয়েছে, তাঁর হাতে প্রতিষ্ঠিত এ ঐশী আন্দোলন বিশ্বে বিস্তৃত

হবে, উন্নতি করবে পরিশেষে গোটা বিশ্বকে নিজের মাঝে আত্মস্থ করে নিবে।

আহ্মদীয়াত সেই সুসংবাদের আন্তর্জাতিক আন্দোলন। আল্লাহুতাআলার সেই প্রতিশ্রুতি পূরণ হওয়ার সময় এখন কাছে এসে গেছে। আল্লাহুতাআলা নিজ প্রতিশ্রুতি অনুযায়ী আখেরীনদের সময়কালে আমাদের প্রভু ও নেতা হযরত মুহাম্মদ আরাবী (সাঃ) এর অধম গোলাম ও রসূলে পাক (সাঃ) এর সবচেয়ে বড় প্রেমিক ও আত্মোৎসর্গকারী হযরত মির্যা গোলাম আহ্মদ কাদিয়ানী (আঃ) কে মসীহ মাওউদ ও ইমাম মাহ্দীর পদে অধিষ্ঠিত করেছেন। তাঁর আগমনের একমাত্র উদ্দেশ্য কেবল ইসলামের পুনর্জীবন, ইসলামের প্রচার এবং ইসলামের বিশ্ববিজয়। ইসলামের শিক্ষার ভিত্তি হলো আল্লাহুতাআলার কথা ও অকাট্য বাণী কুরআন মাজীদের ওপর।

এটি সব দিক থেকে পরিপূর্ণ ও কিয়ামত পর্যন্ত সংরক্ষিত। এতে পরিবর্তন, সংশোধন বা সংযোজনের প্রশ্নই উঠতে পারে না। কোন নতুন ধর্ম আসতে পারে না। আর কোন নতুন শরীয়তও প্রবর্তিত হতে পারে না। খোদার রসূল (সাঃ) ভবিষ্যদ্বাণীতে বলেছেন: আখেরীনদের যুগে মুসলমান ইসলামকে বিকৃত করে দিবে এবং নিজেদের মনগড়া ধর্মবিশ্বাস ও কার্যকলাপকে ইসলামের নামে চালাতে থাকবে। ভবিষ্যদ্বাণীতে এ -ও উল্লেখ ছিলো, এমন অবস্থা যখন হয়ে যাবে তখন রহীম ও রহমান খোদা নিজ প্রিয়বান্দা (সাঃ)-এর নামে পতাকাবাহী এ শ্রেষ্ঠ উম্মতকে বন্ধুহীন ও নিঃসহায় ছেড়ে দিবেন না। বরং তাদের পৃষ্ঠপোষকতা ও পথ-প্রদর্শনের জন্যে ইমাম মাহ্দী (আঃ)-কে আবির্ভূত করবেন। 'তিনি ধর্মকে সঞ্জীবিত ও শরীয়তকে প্রতিষ্ঠিত করবেন' - এ প্রতিশ্রুতি অনুযায়ী ইসলামকে সঞ্জীবিত করবেন ও ইসলামী শরীয়তকে প্রতিষ্ঠিত করবেন। তিনি তাঁর মহান সঞ্জীবনী শক্তি দিয়ে সেই নামের মুসলমানকে কাজের মুসলমান বানিয়ে দেবেন। আর এ আধ্যাত্মিক বিপ্লব ও প্রকৃত ইসলামের আন্তর্জাতিক প্রচারের মাধ্যমে পরিশেষে ইসলাম সারা বিশ্বে বিজয় লাভ করবে।

আহ্মদীয়াত এ সত্যতার ঘোষণা দেয়, আল্লাহুতাআলার এসব প্রতিশ্রুতি পূর্ণ হয়ে গেছে। আর যাঁর আসার প্রতিশ্রুতি ছিলো তিনি এসে গেছেন। তিনি এসেছেন এবং বড়ই মাহাত্ম্য ও প্রতাপের সাথে প্রতিশ্রুতিবদ্ধ সব কিছু করে দেখিয়েছেন। আহ্মদীয়াত বিশ্বকে ইসলাম থেকে সরে গিয়ে কিছু দেয়নি। আর কিছু দেওয়ারও ছিল না। কেননা, ইসলাম সব দিক থেকে পরিপূর্ণ ধর্ম। অবশ্য আহ্মদীয়াত বিশ্বকে প্রকৃত ইসলাম দিয়েছে, জীবিত খোদা দিয়েছে, জীবিত রসূলের সাথে পরিচয়

করিয়ে দিয়েছে এবং জীবিত বিশ্বাস দান করেছে। আহ্মদীয়াত বিশ্বকে সময়ের দাবী অনুযায়ী সব কিছুই দিয়েছে। আহ্মদীয়াত ধর্মবিশ্বাস ও আমলের (কর্মপদ্ধতি) সংশোধনও করেছে। আহ্মদীয়াত বিশ্বকে প্রকৃত ইসলামের সাথে পরিচয় করিয়ে দিয়েছে। আহ্মদীয়াত বিশ্বকে সঠিক ইসলামী শিক্ষার তত্ত্বজ্ঞান দান করেছে। অন্যান্য ধর্মের ওপর ইসলামের পরিপূর্ণ বিজয়ের ভিত্তি রচনা করেছে। ইসলামী জীবনের জীবিত ও উজ্জ্বল কর্মের দৃষ্টান্ত দেখিয়েছে। আহ্মদীয়াত প্রাথমিক যুগের ইতিহাসের পুনরাবৃত্তি করতে গিয়ে নিজের মান্যকারীদের মাঝে এক পবিত্র আধ্যাত্মিক বিপ্লব সৃষ্টি করে দিয়েছে। মোট কথা এসব সুস্পষ্ট কর্মকাণ্ড কার্যকরী করার পর যুগের ইমাম পূর্ণ সফলতার সাথে দুনিয়া থেকে বিদায় নিয়েছেন। আজ তাঁর জামাত বিশ্বের সংশোধন, মানবতার সেবা এবং ইসলাম প্রচারের সঠিক আবেগ ও উদ্দীপনার সাথে সারা বিশ্বে এই একনিষ্ঠ সংকল্প নিয়ে কর্মতৎপর :

محمود کر کے چھوڑیں گے ہم حق کو آشکار  
روئے زمیں کو خواہ ہلانا پڑیں ہمیں

“মাহমুদ! সত্যকে মোরা প্রকাশিত করে ছাড়বো।

বিশ্বকে যদিওবা নাড়াতে হয় মোদের।

আহ্মদীয়াত সদা বসন্ত বিরাজিত এক বৃক্ষ। এটা সেই বৃক্ষ যা প্রকৃত মালিক নিজ হাতে রোপণ করেছেন। এর ফলফলাদি সুমিষ্ট ও বিশ্বজনীন। সাধারণত এক গাছে একই রকম ফল ধরে থাকে। কিন্তু এটা এমন এক আজব বৃক্ষ যাতে সব রকমের তাজা তাজা ফল ধরে আর ফল ধরার কোন নির্দিষ্ট ঋতু নেই। সদা এর শাখাগুলো সুমিষ্ট ফলফলাদিতে ভরপুর থাকে। এটা ইসলামের নবজীবনদানকারী বৃক্ষ। এটা হযরত মুহাম্মদ মুস্তাফা (সাঃ) এর প্রকৃত দাস ও আমাদের উচ্চপদস্থ ইমাম হযরত মসীহ মাওউদ (আঃ)-এর বৃক্ষ ও সত্তার বিকাশ। এটা এক পবিত্র বৃক্ষ। এর কল্যাণ বিতরণী আঁচল সময় ও স্থানের সীমা ছাড়িয়ে অনেক উচ্ছে। এটি একটি জীবিত বৃক্ষ। এর ওপর কখনও হেমন্ত অর্থাৎ খরা আসে না। এ গাছ দুর্ঘটনার ঝঞ্ঝা-বাত্যায় আরও প্রবল বেগে বাড়ে, ফুলে ফলে সুশোভিত হয়। যে একে কাটাতে চায় সে স্বয়ং কাটা পড়ে। যে এর ক্ষতি করার ইচ্ছা করে সে স্বয়ং ক্ষতিগ্রস্ত হয় এবং বিফল ও অকৃতকার্য হয়ে যায়। এটা সেই পবিত্র বৃক্ষ যার মালী স্বয়ং খোদা। এর সুরক্ষা ও

উন্নতির দায়িত্ব সেই সর্বশক্তিমান ও শক্তিশালী সত্তার যিনি সারা বিশ্বের মালিক।

যেভাবে মাটির কণা ও আকাশের তারকা গণনা করা যায় না সেভাবেই আহ্মদীয়াত বৃক্ষের সুমিষ্ট ফলফলাদি গুণে শেষ করা যায় না। আহ্মদীয়াতের পক্ষে প্রকাশিত মহাকাশীয় ও পার্থিব নিদর্শনাবলীর গণনাও সম্ভব নয়। তেমনিভাবে আহ্মদীয়াত সারা বিশ্বকে যে কল্যাণরাজি দান করেছে, যেসব অনুগ্রহ ও পুরস্কার দুনিয়াবাসীকে দিয়েছে এবং এ পবিত্র বৃক্ষে যে সুমিষ্ট ফলফলাদি ধরেছে এবং ধরতে থাকবে এসবের তো গণনা করার চেষ্টা করা যাবে, কিন্তু এগুলো বর্ণনার সীমায় আনা কোনভাবেই সম্ভব নয়।

ইসলামের বিশ্বব্যাপী বিজয়ের মহান উদ্দেশ্যের প্রেক্ষিতে আহ্মদীয়াত কী করেছে এবং আহ্মদীয়াত বিশ্বকে কী দিয়েছে? এটা এমন একটি প্রশ্ন বিভিন্নভাবে এর উত্তর দেওয়া যেতে পারে। আর প্রত্যেক জবাব নিজের মাঝে এক আকর্ষণ ও গৌরব বহন করে। কেননা, প্রত্যেক জবাব আসলে আহ্মদীয়াতের মনোরম আকৃতির কোন একটি দিকের আবরণ উন্মোচনকারী হয়ে থাকে। আর এ ঐশী আহ্বান সত্যতার সৌন্দর্যকে দিগ্ভীমান করে থাকে।

জীবিত খোদা দান করেছে

আল্লাহতাআলার অস্তিত্বে ঈমান ও দৃঢ় বিশ্বাস প্রকৃতপক্ষে ধর্মের ভিত্তি। আর আধ্যাত্মিকতার কেন্দ্রীয় চিহ্ন। এটা ছাড়া ধর্মের কল্পনাই বৃথা হয়ে যায়। ইসলাম খোদাতাআলার অস্তিত্বকে একটি জীবিত সত্য হিসেবে উপস্থাপন করেছে। তিনি বিশ্ব জগতের স্রষ্টা ও কর্তা এবং বিশ্ব জগতের প্রভু-প্রতিপালকও। এ খোদার সাক্ষাৎ এ জীবনে সম্ভব। ইসলাম কর্তৃক উপস্থাপনকৃত এক জীবিত ও চিরস্থায়ী খোদা। তাঁর সত্তার একটি প্রমাণ হলো, তিনি নিজ বান্দাদের দোয়া শুনে থাকেন এবং জবাব দেন। আল্লাহতাআলা বলেন,

ادْعُونِي أَسْتَجِبْ لَكُمْ

(উদউনী আসতাজিবলাকুম)

অর্থাৎ আমার বান্দারা! তোমরা আমাকে ডাকো আমি তোমাদের দোয়া শুনবো (সূরা মর্মিন : ৬১)। আর এ খোদার প্রতিশ্রুতিও রয়েছে, তোমাদের ঈমান যদি প্রকৃত হয় আর তোমরা ইসতিকামত বা স্বেচ্ছের ক্ষেত্রে সুদৃঢ়ভাবে প্রতিষ্ঠিত থাকো

তাহলে তোমাদের ওহী ইলহামের ভাষার দেওয়া হবে। তোমরা ফিরিশতাদের সাথে বাক্যালাপ করতে পারবে- এ জগতেও আর পরজগতেও। কিন্তু পরিতাপের সাথে বলতে হয়, যখন এ আখেরীনদের পর্যায়ে মুসলমানদের মাঝে ধর্মবিশ্বাস ও আমলে দুর্বলতার পালা এলো তখন তারা এসব প্রিয় শিক্ষাকে পুরোপুরি স্বেচ্ছায় ভুলে বসলো। দোয়ার জবাব দানকারী জীবিত খোদার ওপর থেকে তাদের বিশ্বাস উঠে গেলো। আল্লাহর সাক্ষাৎ আর ওহী ইলহামের অস্বীকারকারী হয়ে গেলো। এসব কথাই বলা হয়েছে আর প্রকৃতপক্ষে এসবই ইসলামকে অন্যান্য ধর্ম থেকে বৈশিষ্ট্যমণ্ডিত করে। পরিতাপের সাথে বলতে হয়, এসব কথার সাথে এযুগের মুসলমানরা একেবারেই অপরিচিত হয়ে গেছে। খোদাতাআলার অস্তিত্বের মনকাড়া আলোচনা তাদের বৈঠক থেকে লোপ পেতে লাগলো। খোদাতাআলার জীবিত বাণীর কথা বলার এমন কেউ আর থাকলো না। দোয়ার করুলিয়তের আলোচনাও এক রূপকথার কিস্সায় পরিণত হলো। এ চূড়ান্ত অন্ধকার ও নৈরাশ্যের জগতে কাদিয়ানের অজ্ঞাত-অখ্যাত পত্নী থেকে তৌহীদ তথা একত্ববাদের ধ্বনি অতি প্রতাপের সাথে উচ্চকিত হলো :

وہ خدا اب بھی بناتا ہے جسے چاہے کلیم

اب بھی اس سے بولتا ہے جس سے وہ کرتا ہے پیار

“সেই খোদা এখনও যার সাথে চান কলীমে (অর্থাৎ যিনি বাক্যালাপ করেন) পরিণত হন,

এখনও তার সাথে কথা বলেন যাকে তিনি ভালবাসেন”।

এ প্রতাপপূর্ণ ঘোষণা ছিলো গৌরবান্বিত জামাতে আহমদীয়ার প্রতিষ্ঠাতা হযরত মির্যা গোলাম আহমদ কাদিয়ানী আলায়হেস্ সালামের। মনমরা মুসলমানদের তিনি এ সুসমাচার শোনালেন, আমাদের খোদা এক জীবিত খোদা। তাঁর উত্তম ও প্রিয় গুণাবলীর কোন একটি গুণও রহিত হতে পারে না। তিনি আজও শুনেন যেভাবে আগে শুনতেন। তিনি আজও কথা বলেন যেভাবে আগে কথা বলতেন। তিনি (আঃ) বলেছেনঃ-

“জীবিত ধর্ম তা-ই যার মাধ্যমে জীবিত খোদা লাভ হয়। জীবিত খোদা তিনিই যিনি কোন মাধ্যম ছাড়া আমাদের মুলহিম বা ইলহামপ্রাপ্ত করতে পারেন। আর কমপক্ষে

এটা হতে পারে আমরা কোন মাধ্যম ছাড়া ইলহামপ্রাপ্ত ব্যক্তিকে দেখতে পারি। সুতরাং আমি সারা বিশ্বকে এ সুসংবাদ দিচ্ছি, জীবিত খোদা ইসলামের খোদা” (মজমুআ ইশতিহারাৎ, লন্ডনে মুদ্রিত ১৯৮৩, ২য় খন্ড, পৃষ্ঠা ৩১১)।

তিনি নিজের সত্ত্বা ও নিজস্ব অভিজ্ঞতাকে প্রমাণ হিসেবে উপস্থাপন করতে গিয়ে বিশ্বকে এ সুসংবাদ দিয়েছেন, ‘দেখ, খোদা আমাকে এ কল্যাণে ভূষিত করেছেন’। তিনি (আঃ) বলেন :

“খোদাতাআলার সাথে জীবিত সম্পর্ক স্থাপিত হওয়া ইসলাম গ্রহণ করা ছাড়া কখনও সম্ভব হতে পারে না। কখনও সম্ভব হতে পারে না। .....এসো জীবিত খোদা কোথায় ও কোন জাতির সাথে আছেন এ সম্বন্ধে আমি তোমাদের বলে দিই।

ইসলাম এখন মুসার তুরের ন্যায়। এখানে খোদা কথা বলছেন। সেই খোদা যিনি নবীদের সাথে বাক্যালাপ করতেন এরপর চুপ হয়ে গেলেন। আজ তিনি একজন মুসলমানের অন্তরে কথা বলছেন” (রুহানী খাযায়েন, লন্ডনে মুদ্রিত ১৯৮৪, খন্ড ১১, যমীমা আঞ্জামে আখম, পৃষ্ঠা ৬২)।

তাঁর এ ঘোষণা ছিলো বিপ্লবাত্মক। এটা ধর্মীয় জগতে একটি কম্পন সৃষ্টি করে দিলো। আল্লাহতাআলার সত্ত্বার এ ঘোষণা ও সাক্ষ্যদাতা এক চুম্বক সত্ত্বা বলে প্রমাণিত হলেন। তাঁর কাছে ভদ্রস্বভাবাপন্ন লোকেরা দলে দলে আসতে লাগলেন। এ সত্ত্বার কল্যাণে অভিষিক্ত হয়ে খোদার মানুষে পরিণত হলেন। এটা ছিলো সেই পবিত্র গোষ্ঠী। এক বিশ্বের জন্যে এরা খোদা দর্শনের মাধ্যমে পরিণত হলেন।

আহমদীয়াতের মাধ্যমে আল্লাহতাআলা বিশ্বের ওপর মহান করুণা করেছেন। বিশ্বকে সেই মনোনীত মসীহ মাওউদ ইমাম মাহুদী দান করেছেন। জীবন্ত খোদার জীবন্ত জ্যোতির্বিকাশের ওপর এক ঈমান ও প্রজ্ঞাপূর্ণ ঈমান দান করেছেন। নিজের সত্ত্বাকে আল্লাহর পবিত্র সত্ত্বার একটি জীবন্ত সাক্ষী হিসেবে উপস্থাপন করেছেন। আর নিজের মান্যকারীদের মাঝে নিজ পবিত্র কল্যাণপ্রদ শক্তির মাধ্যমে এমন পবিত্র বিপ্লব সৃষ্টি করেছেন যে, তারা খোদার মানুষে পরিণত হয়েছেন। আহমদীয়াত খোদা-মনোনীত এমন শক্তি ও মাহাত্ম্যের এক বিরাট গোষ্ঠী দুনিয়াকে দান করেছে। তাদের জীবন প্রদায়িনী অভিজ্ঞতা সব সময় মানব প্রজন্মের জন্যে খোদা দর্শনের পথ আলোকিত করতে থাকবে।

হাজার হাজার দৃষ্টান্তের মাত্র একটি সম্বন্ধে আলোকপাত করবো। হযরত মসীহ মাওউদ আলায়হেস সালামের এক সাহাবী হলেন হযরত মৌলভী মুহাম্মদ ইলিয়াস

খান সাহেব (রাঃ)। তিনি বর্ণনা করেন, কালাত রাজ্যের প্রধান বিচারপতি হলেন আব্দুল আলী আখওয়ান্দাযাদা। মাস্তুজ-এর এক বিশাল সভায় উচ্চ শব্দে তাঁকে (অর্থাৎ ইলিয়াস খান সাহেবকে) উদ্দেশ্য করে তিনি বলেন, আমি আপনাকে জিজ্ঞেস করছি, ‘সারা সীমাস্ত প্রদেশে আপনি কোন আধ্যাত্মিক পীর পেলেন না যে, আপনি এক পাঞ্জাবী মির্যা গোলাম আহমদ কাদিয়ানীর বয়াত করে নিয়েছেন?’

হযরত মৌলভী সাহেব (রাঃ) সাথে সাথে যে সঠিক ও ঈমানবর্ধক জবাব দিয়েছিলেন তা শোনার যোগ্য। তিনি (রাঃ) বলেন,

“আখওয়ান্দাযাদা সাহেব! আসল কথা তো এটাই। আমার খোদা আমার কাছ থেকে লুকিয়ে গিয়েছিলেন। আমি প্রত্যেক ধর্মে তাঁকে খুঁজতে ছিলাম। প্রত্যেক ধর্ম আমাকে পুরনো কিসসা কাহিনীর দিকে নিয়ে যাচ্ছিলো। আমি প্রত্যেককে জিজ্ঞেস করতাম, সেই খোদা কি এখনও কথা বলেন? তখন তারা বলতেন, এখন কথা বলেন না আমি মুসলমানদের ৭২টি ফিরকার প্রত্যেকটি ফিরকার কাছে গিয়েছি। তারাও আমাকে এ জবাবই দিয়েছেন। হযরত মুহাম্মদ মুস্তাফা সাল্লাল্লাহু আলায়হে ওয়া সাল্লামের পর এখন খোদা কথা বলেন না। ওহীর দরজা একেবারে বন্ধ। তখন আমি এ সিদ্ধান্তে পৌঁছলাম, আসলে খোদা নেই। বরং একটি দর্শন মাত্র। কেবল পুরনো কিসসা কাহিনীতে সীমবদ্ধ। নচেৎ আল্লাহ তো সেই সত্তারই হওয়া আবশ্যিক যা সব রকমের সুন্দর গুণের আকার। কোন গুণই রহিত হওয়ার নয়। আগে কথা বলতেন আর এখন তাঁর বাক্যালাপের গুণে মোহর লেগে গেছে- এটা কি করে হতে পারে? নাস্তিক হয়ে গিয়েছিলাম প্রায়। পেছন থেকে একটি কোমল হাত আমার কাঁধ ধরে ফেললেন আর বললেন: মুহাম্মদ ইলিয়াস কী ব্যাপার! অস্তির হচ্ছ কেন? আমি বললাম, খোদার মাহাত্ম্য বুঝে গেছি। ওটি একটি দর্শন মাত্র। আসলে নেই। কেননা, যাকে জিজ্ঞেস করি সেই বলে, খোদা আগে কথা বলতেন এখন বলেন না। তিনি আমার হাত ধরলেন। এ ব্যক্তিই ছিলেন হযরত মির্যা গোলাম আহমদ কাদিয়ানী। তিনি বললেন, এসো, আমি তোমাকে বলছি। তিনি এখনও কথা বলেন। শর্ত এই, তুমি আমার হাতে বয়াত করো। কেননা, আমি খোদার পক্ষ থেকে মসীহ ও মাহদী। খোদা তোমার ওপরও অবতীর্ণ হবে। তিনি চাইলে তোমার সাথেও কথা বলবেন। আব্দুল আলী আখওয়ান্দাযাদা সাহেব! এখন আমি খোদার সত্তার কসম খেয়ে বলছি, যাঁর নামে মিথ্যা কসম খাওয়া অভিশপ্তদের কাজ, মির্যা গোলাম আহমদ কাদিয়ানীর খোদা আমার সাথেও কথা বলেন। আমি আপনাকে

জিজ্ঞেস করেছি, এখন এমন কেউ আছে কি যে দাবী করে বলতে পারে খোদা তার সাথে কথা বলেন?

সমস্ত সভায় পিন পতন নীরবতা! কিছুক্ষণ এভাবে থাকার পরও কারও পক্ষ থেকে কোন জবাব এলো না। তখন মৌলভী সাহেব বললেন, ‘আমি এমন পথ ও সেকেলে ইসলাম দিয়ে কী করবো যা কেবল রসুম ও বিদাতপূর্ণ ইসলাম হিসেবে রয়ে গেছে? এতে খোদা কথা বলেন না। আর কেনই বা মির্যা গোলাম আহমদ কাদিয়ানীর ইসলাম গ্রহণ করবো না? এটাই সত্যিকারের ইসলাম। এতে খোদা লাভ হয়। আর প্রিয় ও ভালবাসার সাথে বাক্যালাপে ভূষিত করা হয় (হায়াতে ইলিয়াস, প্রণেতা আব্দুস সালাম খান, পৃষ্ঠা ১১৮)। এই হলেন সেই জীবিত খোদা আর তাঁর জীবিত থাকার ঈমানবর্ধক অভিজ্ঞতা। আহমদরীত বিশ্বকে এটাই দান করেছে।

## প্রকৃত ইসলাম

আহমদীয়াত বিশ্বকে কী দিয়েছে? এর আর একটি জবাব এই, আহমদীয়াত বিশ্বকে প্রকৃত ইসলাম দান করেছে। এটাই সেই ইসলাম, যা আমাদের প্রভু ও নেতা হযরত মুহাম্মদ মুস্তাফা সাল্লাল্লাহু আলায়হে ওয়া সাল্লামের পবিত্র ইসলাম। সেই সত্য ও প্রকৃত পথনির্দেশনাপূর্ণ বাণী কুরআন মাজীদার আকারে প্রণীত। এর উত্তম ব্যাখ্যা হলো রসূলে করীম (সাঃ)-এর সুন্নত। আর এর উত্তম বিবরণ রসূলে (সাঃ)-এর হাদীসে দেখতে পাওয়া যায়। সত্য কথা তো এই, মানবতার দুঃখ কষ্টের চিকিৎসা ও সারা বিশ্বের অবক্ষয়ের প্রতিষেধক পৃথিবীতে থেকে থাকলে তা ইসলামই। এর শিক্ষা আরবে অসভ্য মুশরিক ও বিধর্মী পরিবেশে হঠাৎ এমন বিপুল সৃষ্টি করে দিয়েছিলো, কোন চোখ এর আগে তা দেখেনি আর কোন কানও শুনেনি। অবশ্য সেই বিপুবই ছিলো আমাদের পথপ্রদর্শক ও প্রভু হযরত মুহাম্মদ মুস্তাফা সাল্লাল্লাহু আলায়হে ওয়া সাল্লামের অন্ধকারও রাতের দোয়ার সুফল।

তিনি পথপ্রদর্শক ও গোমরাহীর সব মরিচা ধুয়ে মুছে দিয়েছেন। পাপের অন্ধকার কেটে পুণ্য, সংপথ ও আধ্যাত্মিকতার সোনালী দিবাকর সারা বিশ্বে উদ্ভিত করে দিয়েছেন। এটা সত্যিকারের ইসলাম। আর এটাই ইসলাম।

আজ এটাই বিশ্বের সমস্ত অবক্ষয়ের প্রতিষেধক। এটাই প্রকৃত ইসলাম আহমদীয়াত এ যুগে বিশ্বকে এটা দান করেছে। আহমদীয়াত বিশ্বকে কোন নতুন ইসলাম দেয়নি

বরং আহমদীয়াত প্রত্যেক নতুন ও স্বঘোষিত ইসলামের বিনাশকারীর নাম এবং মুহাম্মদ মুস্তাফা সাল্লাল্লাহু আলায়হে ওয়া সাল্লাম কর্তৃক আনীত প্রকৃত ইসলাম দ্বিতীয়বার প্রতিষ্ঠাকারীর নাম। আহমদীয়াত সেই প্রকৃত ইসলামের এ জীবন্ত দৃষ্টান্ত বিশ্বকে দান করেছে। ইসলামের এ জীবন্ত ও জীবন প্রদায়িণী বাণীকে কার্যকর দৃষ্টান্ত হিসেবে বিশ্বকে দেখিয়েছে। এটা এমন এক সত্য অন্যান্যরা প্রকাশ্যে এর স্বীকৃতি দিয়েছে।

ইসলামী বিশ্বের বিখ্যাত চিন্তাবিদ ও কবি আল্লামা ইকবাল বলেন :

**In the Punjab the essentially Muslim type of character has found a powerful expression in the so-called Qadiani Sect. (The Muslim Community A sociological study by Islam)**

অর্থাৎ “পাঞ্জাবে ইসলামী চরিত্রের নির্ভেজাল দৃষ্টান্ত এ জামাতের আকারে প্রকাশিত হয়েছে যাকে ফিরকা কাদিয়ানী বলা হয়ে থাকে” (মাওলানা জাফর আলী খান কর্তৃক উর্দু অনুবাদ ‘মিল্লাত বায়যা পর এক উমরানী নয়র’ এর প্রথম প্রকাশ ১৯৭০, সাপ্তাহিক ‘রাফতারে যামানা’ লাহোর ২০শে সেপ্টেম্বর ১৯৪৯, পৃষ্ঠা ১৮) বিখ্যাত ইসলামী চিন্তাবিদ পুস্তক প্রণেতা ও সাংবাদিক আল্লামা নিয়াজ ফতেহপুরী হযরত মসীহ মাওউদ (আঃ) সম্পর্কে লিখেন :

“এতে সন্দেহ নেই, তিনি নিশ্চিন্তভাবে ইসলামী চরিত্রকে দ্বিতীয়বার জীবিত করেছেন। আর এমন একটি জামাত সৃষ্টি করে দেখিয়েছেন যার জীবন আমরা নিশ্চিন্তভাবে নবী (সাঃ)-এর আদর্শের ওপর প্রতিষ্ঠিত বলতে পারি।” (নিয়াজ ফতেহপুরীর মতামত, সংকলন মুহাম্মদ আজমল শাহেদ, প্রকাশক জামাত আহমদীয়া করাচী, পৃঃ ২৯, পত্রিকা ‘নিগার’, লঙ্কৌ থেকে, নভেম্বর, ১৯৫৯)।

## পবিত্র ইসলামী সমাজ

আজ ইসলামী বিশ্ব বিশৃঙ্খলার শিকার হয়েছে। ভালবাসা ও ভ্রাতৃত্ব মুসলমানদের প্রাণে দুর্লভ। মুসলিম রাষ্ট্রের শহরগুলো বেহায়াপনা ও কুকর্মের কেন্দ্রে পরিণত হয়েছে। এদের আবাসগৃহ ও অলিগলি ইসলামী আখলাক থেকে বঞ্চিত দেখা যাচ্ছে। ইসলামী রাষ্ট্রের পত্র-পত্রিকা দেখে এমন মনে হয়, সারা বিশ্বের অপরাধ এসব দেশে ঘাটি গাঁড়ে বসেছে। ইসলামী শিক্ষা ও চারিত্রিক মান এতটা

দেউলিয়া হয়ে গেছে যেন এ কুকর্মকারী সমাজকে ইসলামের প্রতি আরোপিত করা ইসলাম ধর্মের প্রতি ভয়ানক অবমাননার বিষয়। এ অবস্থা দেখে মুখে এ কবিতার পংক্তি বের হয় :

وائے ناکامی متاع کارواں جاتا رہا  
کارواں کے دل سے احساس زیاں جاتا رہا

আমাদের মূল্যবান সম্পদ যা ছিলো  
তা মোরা হারিয়ে ফেলেছি,  
আর এতে কাফেলার মনে কোন  
আফসোসের অনুভূতি অবশিষ্ট নেই ॥

এ সমাজের লোক যখন এই প্রশ্ন করে, আহমদীয়াত বিশ্বকে কী দিয়েছে? তখন তাদের জন্যে আমাদের উত্তর এই, ধ্বংসের গহ্বরের কিনারে দাঁড়ানো বিশ্বকে সত্য ও নিরাপত্তার পথ দেখিয়েছে। আহমদীয়াত বিশ্বকে এক সঠিক পবিত্র ইসলামী সমাজ দান করেছে। এটি সঠিক ইসলামী শিক্ষা ও মাহাত্মের ওপর প্রতিষ্ঠিত। কারণ যদি অন্তর্দৃষ্টি লাভ হয়ে থাকে তাহলে সে প্রত্যেক দেশ, প্রত্যেক জনবসতিতে আহমদী জামাতের মাঝে এ সমাজ প্রত্যক্ষ করতে পারে। সেখানে আল্লাহ ও রসূল (সাঃ)-এর ভালবাসার উল্লেখ অব্যাহত আছে। সেখানকার রাত ও দিন ইবাদতে কাটে। সেখানে তরবিয়ত ও চারিত্রিক সংশোধনের খাতিরে দিনরাত চেষ্টার একটি অবিচ্ছিন্ন ধারা জারী আছে। সেখানে পুণ্যের প্রতি ভালবাসা আর মন্দের প্রতি ঘৃণার অভিব্যক্তি ঘটে থাকে। সেখানে কল্যাণের প্রতিযোগিতার যে দৃশ্য পরিদৃষ্ট হয় সেগুলো আত্মকে বিকশিত করে। সেখানে প্রাথমিক যুগের সাহাবাদের রঙ্গ রঙ্গীন হয়ে প্রাণ ও ধনসম্পদের উপহার উপস্থাপন করা হয়ে থাকে। কী কী বিষয়ে বর্ণনা করবো! এটা সেই জীবন প্রদায়িণী সমাজ। আল্লাহর আশিসক্রমে আহমদীয়াতের কল্যাণে এটা পৃথিবীতে প্রতিষ্ঠিত হয়েছে। এর সীমা-পরিসীমা ব্যাপক থেকে ব্যাপকতর হয়ে যাচ্ছে।

আহমদীয়াতের এই শেষ যুগে পৃথিবীকে সেই ইসলামী সমাজ দান করেছে। এটা

আসলে এ আন্তর্জাতিক আধ্যাত্মিক বিপ্লবের সূচনালক্ষণ। এর কল্যাণে বিশ্ব বর্তমান শতকে, ইনশাআল্লাহ এক আধ্যাত্মিক দৃশ্য দেখবে। নতুন এক বিশ্ব হবে আর এক নতুন আকাশ। সারা বিশ্ব ইসলামের সূর্য রশ্মিতে আলোকমণ্ডিত হবে। আজ আহ্মদীয়াতের বিশ্ব ইসলাম বরং সারা বিশ্বের জন্যে বাণী এই :

آؤ لوگو کہ یہیں نور خدا پاؤ گے  
لو تمہیں طور تسلی کا بتایا ہم نے

এসো লোক সকল! এখানে খোদার  
জ্যোতি দেখতে পাবে।  
নাও, তোমাদের সান্ত্বনা-বাণী  
দিয়েছি মোরা।

## পবিত্র পরিবর্তন

সাইয়েদনা হযরত মসীহ মাওউদ (আঃ)-এর সত্তা ছিলো পরশ পাথরের মত এক কল্যাণ বিতরণী কল্যাণমণ্ডিত সত্তা। যে-ই তাঁর সাথে সত্যিকারের সম্পর্ক সৃষ্টি করতো তার বিশ্বই বদলে যেতো। মাটির কণা সুরাইয়া নক্ষত্রের সাথে আলিঙ্গন করতো। তার পুরনো জীবনের ওপর একটি মৃত্যু আপতিত হতো। তার এক নতুন আধ্যাত্মিক জীবন লাভ হতো। পাপের মলিনতা থেকে নির্মল ও পরিচ্ছন্ন হয়ে পুণ্যের মূর্ত প্রতীকে পরিণত হতো। আর যে পুণ্যের প্রাথমিক পর্যায়ে থাকে সে এমন আধ্যাত্মিক পথ অবলম্বন করে দৌড়াতে থাকে যেন দেখতে দেখতে আধ্যাত্মিকতার উচ্চ মার্গে গিয়ে পৌঁছায়। আধ্যাত্মিক ও পবিত্র বিপ্লবের এ মহান ভাঙার আহ্মদীয়াত বিশ্বকে দান করেছে। এর ধারা আজও বলবৎ রয়েছে। হযরত মসীহ মাওউদ (আঃ) বলেছেন,

“আমি দেখতে পাচ্ছি, আমার হাতে হাজার হাজার এমন বয়াতকারী আছে যাদের আমলের অবস্থা এর আগে খারাপ ছিল। বয়াত করার পর তাদের আমলের অবস্থা শুধরে গেছে। নানা রকম পাপ থেকে তারা তওবা করেছে। রীতিমত নামাযের আদায়কারী হয়েছে। শত শত এমন লোক আমার জামাতে পাচ্ছি, কিভাবে তারা

কুশ্রোচনার আবেগ থেকে পবিত্র হয় তাদের অন্তরে এ জ্বালা ও দহন সৃষ্টি হয়ে গেছে।” (রুহানী খাযায়েন, লন্ডন মুদ্রিত, ১৯৮৪, ২২ খন্ড, হাকীকাতুল ওহী, পৃষ্ঠা ৮৬ টীকা)।

হিন্দুস্তানের একজন বিখ্যাত আলেমে দ্বীন মৌলবী হাসান আলী সাহেব (রাঃ) ১৮৯৪ খৃষ্টাব্দে হযরত মসীহ মাওউদ (আঃ) এর আনুগত্যের আঁচলে অবস্থান নেন। ধর্মের সেবার কারণে হিন্দুস্তানে খুবই সুনাম ছিলো। কেউ তাঁকে জিজ্ঞেস করলো, বয়াত করে আপনি কী পেলেন? তিনি উত্তর দিলেন : ‘মৃত ছিলাম। এখন জীবিত হয়ে চলছি। গোপন পাপের উল্লেখ করা ঠিক নয়। কুরআন করীমের যে মাহাত্ম্য এখন আমার প্রাণে রয়েছে হযরত রসূলে খোদা (সাঃ)এর যে মাহাত্ম্য আমার প্রাণে এখন রয়েছে, তা আগে ছিলো না। এসব হযরত মির্যা সাহেবের বদৌলতে লাভ হয়েছে।’

(‘তাইদে হাক্’, প্রণেতা মৌলভী হাসান আলী সাহেব, ৩য় সংকলন, ২৩ ডিসেম্বর, ১৯৩২ আন্বাহ বখস স্টীম প্রেস কাদিয়ান, পৃষ্ঠা ৭৯)।

হযরত মাওলানা গোলাম রসূল রাজীকি সাহেব (রাঃ) বর্ণনা করেন। তহশীলদার নওয়াব খান সাহেব একবার হযরত মাওলানা নূরুদ্দীন সাহেবকে (রাঃ) জিজ্ঞেস করেন, মাওলানা! আপনি তো আগেই শীর্ষস্থানীয় বুযুর্গ ছিলেন। মির্যা সাহেবের কাছে বয়াত করার ফলে আপনার অধিক কি কল্যাণ লাভ হয়েছে? এতে হযরত মাওলানা নূরুদ্দীন সাহেব (রাঃ) বলেন,

“নওয়াব খান! হযরত মির্যা সাহেবের কাছে বয়াত করার ফলে আমার অনেক উপকার হয়েছে। এর মাঝে একটি উপকার এই আগে আমি নবী করীম (সাঃ) এর দর্শন স্বপ্নের মাধ্যমে লাভ করতাম আর এখন জাগ্রত অবস্থায় লাভ করে থাকি।”

(‘হায়াতে নূর’, প্রণেতা শেখ আব্দুল কাদের সাহেব সওদাগর মল, পৃষ্ঠা ১৯৪)। আহ্মদীয়াতের ইতিহাস এমন দৃষ্টান্তে ভরপুর যে, নতুন যোগদানকারীদের জীবনে আহ্মদীয়াত একটি মহান আধ্যাত্মিক বিপ্লব সৃষ্টি করে দিয়েছে। তাদের পাপের কালিমা থেকে পবিত্র করে ইসলামী শিক্ষার ওপর সত্যিকার আমলকারী বানিয়ে দিয়েছে। এতে এমন লোকও ছিলেন, আহ্মদী হওয়ার আগে সে এলাকার ভয়ানক ডাকাত ছিলো। আহ্মদীয়াত তাকে এমনভাবে বদলে দিয়েছে যে, তিনি খোদা দর্শন করার সন্তায় পরিণত হয়েছেন। এমন লোকও ছিলেন, দৈনিক ঘুষ নেওয়া যার অভ্যাসে পরিণত হয়েছিলো। আহ্মদী হওয়ার পর নোটের বাউল কোমরে গুঁজে

গ্রামে গ্রামে ঘুরে এ ঘোষণা দিতেন, যে আমাকে ঘুষ দিয়েছে সে নিজের টাকা আমার কাছ থেকে ফিরিয়ে নিতে পারে। এমন খৃষ্টানও ছিল প্রত্যেক দিন ঘুমাবার আগে যে রসূলে খোদা (সাঃ)-কে গালি দিয়ে ঘুমাতে যেতো। আহমদী হওয়ার পর গোলাপের পানি দিয়ে মুখ পরিষ্কার করে দরুদ ও সালাম পাঠ করে ঘুমুতে যেতেন। ইংল্যান্ডের বশীর আহমদ আর্চাড সাহেব খৃষ্টবাদ থেকে তওবা করে ১৯৪৪ খৃষ্টাব্দে আহমদী মুসলমান হন। জুয়া ও মদ পান থেকে তওবা করেন। ইসলামী শিক্ষার এমন পালনকারী হন যে, দোয়াকারী বুয়ুর্গে পরিণত হয়ে যান। ওসীয়তের ব্যবস্থাপনার অধীন হয়ে ১/৩ অংশ ওসীয়ত করেন। জীবন উৎসর্গ করেন। আর প্রথম ইংরেজ মুবাঞ্জিগ হিসেবে দীর্ঘ সময় সেবা করার সৌভাগ্য লাভ করেন। সিয়েরালিওনের আলী Rogers যৌবন কালে আহমদীয়াত গ্রহণ করেন। তাঁর ১২ জন স্ত্রী ছিল। ইসলামী শিক্ষা অনুযায়ী ৪জন স্ত্রী রাখলেন। অন্যদের বিদায় করে দিলেন।

(মাসিক ‘আনসারুল্লাহ’ রাবওয়া এর বরাতে, মার্চ ১৯৮৪, পৃষ্ঠা ৩০-৩১)। আমেরিকার একজন বিখ্যাত মিউজিশিয়ান আহমদীয়াত গ্রহণ করেন। বাদ্যযন্ত্রের প্রতি ঝাঁক একেবারেই স্তিমিত হয়ে গেলো। নিজের কর্মকান্ড ও তাঁর সব আয়কে তুচ্ছ জ্ঞান করে দরবেশের মত জীবন অবলম্বন করেন। তাহাজ্জুদের আদায়কারী হন। রসূল (সাঃ)-এর এমন প্রেমিকে পরিণত হন, আঁ হযরত (সাঃ)-এর নাম নিতেই চোখে পানি এসে যেতো [মাসিক খালিদ, রাবওয়া-এর বরাতে, জানুয়ারী ১৯৮৮, পৃষ্ঠা ৪০ এবং জুমআর খুতবা হযরত খলীফাতুল মসীহ রাবে’ (রাহেঃ) ১৬ই অক্টোবর, ১৯৮৭]।

পুণ্য ও পবিত্র পরিবর্তনের এসব ঘটনা কোন কল্প-কাহিনী নয়। এগুলো বাস্তব ঘটনা। এমন অলৌকিক ও ঈমানবর্ধক বাস্তব ঘটনা দিয়ে আহমদীয়াতের আঁচল পরিপূর্ণ। এ অলৌকিক ঘটনা পৃথিবীর স্থানে স্থানে পরিলক্ষিত হয়। বিশ্বের প্রত্যেক অঞ্চলে এ সম্বন্ধে সাক্ষ্য দিবে। হযরত মসীহে মাওউদ (আঃ) স্বয়ং বলেন :

“আমার জামাত যতটা পুণ্য ও যোগ্যতায় উন্নতি করেছে এটাও একটি মু’জিবা”।

(সীরাতুল মাহদী, কাদিয়ানে মুদ্রিত, ১৯৩৫, ১ম খন্ড, পৃষ্ঠা ১৬৫)।

হিন্দুস্থানের একটি পত্রিকা এ সত্যকে এমন ভাষায় স্বীকৃতি দিয়েছে :

“কাদিয়ানের পবিত্র শহরে এক হিন্দুস্তানী পয়গম্বর জন্ম নিয়েছেন। তিনি তাঁর পরিবেশ পুণ্য ও উন্নত চরিত্রে ভরে দিয়েছেন। এ উত্তম গুণাবলী তাঁর লক্ষ লক্ষ

মান্যকারীদের জীবনেও প্রতিফলিত হয়েছে’ (স্টেটসম্যান, দিল্লী, ১২ ফেব্রুয়ারী, ১৯৪৯, তাহরীকে আহমদীয়াত, বরকত আহমদ রাজেকী সাহেব, কাদিয়ানে মুদ্রিত ১৯৫৮, পৃষ্ঠা ১৩)।

অধম নিবেদন করছে, লক্ষের যুগতো কবেই শেষ হয়ে গেছে। এখন কোটির যুগ এসে গেছে। অর্বুদের যুগও বেশি দূরে নয়। এটা আন্তর্জাতিক আধ্যাত্মিক বিপ্লবের জীবন ও আশার সেই বাণী যা আহমদীয়াত বিশ্বকে দিয়েছে। হযরত মসীহ মাওউদ (আঃ) কী সত্য কথাই বলেছেন :

“এ গাছকে এর ফল দিয়ে আর এ সূর্যকে এর জ্যোতি দিয়ে সনাক্ত করবে” (ক্বহানী খাযায়েন, লন্ডনে মুদ্রিত, ১৯৮৪, ৩য় খন্ড, ফতেহ ইসলাম, পৃষ্ঠা ৪৪)।

## ‘খিলাফতে আহমদীয়া’ পুরস্কার

জামাতে আহমদীয়া বিশ্বকে কেবল সত্যিকারের ইসলাম সম্বন্ধেই অবহিত করে নি বরং এ আধ্যাত্মিক সংগঠনের নেতৃত্ব দান করেছে। একে ইসলামী পরিভাষায় খিলাফতের সংগঠন বলা হয়ে থাকে। এটা সেই কল্যাণময় সংগঠন যার প্রতিশ্রুতি আল্লাহতায়াল্লা তাঁর মু’মিন বান্দাদের সাথে করেছেন। আমলে সালেহা বা সময়োপযোগী পুণ্য কাজ করার শর্ত সাপেক্ষে এ পুরস্কার তারা পেতে থাকবে। প্রাথমিক যুগে আল্লাহতায়াল্লা এ পুরস্কার খিলাফতে রাশেদার আকারে দিয়েছিলেন। এটা পরে রাজত্বে পরিণত হয়। পরিশেষে একবারে সমাপ্তি ঘটে। এ পুরস্কার থেকে বঞ্চিত হওয়ার সাথে সাথে মুসলমানরা সাধারণত প্রত্যেক বিশ্বস্ততা থেকে গভীর লাঞ্ছনার গর্ভে পড়ে যায়। প্রত্যেক ব্যাপারে দুর্ভাগ্য ও প্রত্যেক ক্ষেত্রে পরাজয় তাদের ললাটের লিখন হয়।

ইসলামের জীবিত হওয়ার জন্য আল্লাহতায়াল্লা হযরত ইমাম মাহদী (আঃ)-কে আবির্ভূত করেন। তাঁকে উম্মতি নবুয়তের পদ দেন। আর নিজ প্রতিশ্রুতি অনুযায়ী-

مَا كَانَتْ نَبْوَةٌ قَطُّ إِلَّا تَبِعَتْهَا خَلَافَةٌ

(মা কানাৎ নবুয়াতা কাত্ত্ব ইল্লা তাবিআতুহা)

অর্থাৎ এমন কোন নবুয়ত নেই যার পর খিলাফত নেই (কনযুল উম্মাল, আল্লামা আলাউদ্দিন আলী, ১১ খন্ড, পৃষ্ঠা ১১৫, হাদীস নং ৩১৪৪৪, প্রথম ছাপা, দারুল কুতুব আল ইলমিয়া, বৈরুত, লেবানন, ১৯৯৮)। জামাতে আহমদীয়ার মাঝে

খিলাফত প্রবর্তন করেছেন। যারা খোদার এ পুরস্কার থেকে মুখ ফিরিয়ে নিয়েছে তারা গোমরাহী ও অন্ধকারে বিভ্রান্ত হয়েছে। আর আজও বঞ্চনা ও বিফলতা তাদের ভাগ্যের লিখনে পরিণত হয়েছে। কিন্তু যারা খিলাফতের জ্যোতিতে নিজেদের হৃদয় আলোকিত করেছে তারা সেই খিলাফতরূপ প্রদীপের ওপর পতঙ্গের ন্যায় বিলীন হয়েছে এবং যুগ খলীফার প্রত্যেক ডাকে 'লাব্বায়েক' 'লাব্বায়েক' বলে প্রাণ, সম্পদ এবং মানইজ্জতের উপটোকন উপস্থাপন করাকে নিজেদের সৌভাগ্য মনে করেছে। দেখো ও শুনো, তাদের ওপর কিভাবে খোদাতায়ালার অসাধারণ অনুগ্রহ মুম্বল ধারায় বর্ষিত হয়েছে।

নেয়ামে খিলাফতের কল্যাণে পুণ্যের প্রতিটি ক্ষেত্রে জামাতে আহমদীয়ার উন্নতি ও দৃঢ়তা দেওয়া হয়েছে। ভয়ের সব অবস্থা নিরাপত্তায় পরিবর্তিত হতে থেকেছে। আজ সারা বিশ্বে এ একটি জামাতই খিলাফতের কল্যাণমণ্ডিত সংগঠনে অভিষিক্ত। জামাতের ইতিহাস এর সাক্ষী, বিরোধীতার প্রত্যেকটি আন্দোলন খিলাফতের প্রস্তরে ধাক্কা খেয়ে টুকরো টুকরো হতে থেকেছে; তা পয়গামীদের ফেতনাই হোক বা আহরারীদের ফেৎনা, ১৯৫৩ সনে দেশব্যাপী হাঙ্গামা বা ১৯৭৫ সনের ভয়ানক দাঙ্গা হোক অথবা ১৯৮৪ সনের পরের মর্মভেদী ঘটনাসমূহ হোক যার ফলে পাকিস্তানের ভূমি স্থানে স্থানে নিষ্পাপ আহমদীদের রক্তে রঞ্জিত হয়ে গেছে। যুগখলীফার মহান নেতৃত্বে ও দিক নির্দেশনায় জামাত প্রত্যেক পরীক্ষায় মু'মিনসুলভ মর্যাদার সাথে সামনেই এগিয়ে গেছে। খিলাফতের কল্যাণে জামাত বিজয়ের উচ্চ শিখর স্পর্শ করেছে। আর এর বিলীনতা, কুরবানী, আবেগময় প্রেম ও বিশ্বস্ততার মান উচ্চ থেকে উচ্চতর হয়ে গেছে। বিপদাপদের লেলিহান শিখাও জামাতের নিবেদিত প্রাণ লোকদের মুখ থেকে হাসি কেড়ে নিতে পারেনি। যে ব্যক্তি বলেছিলো, আমি আহমদীদের হাতে ভিক্ষার বুলি ধরিয়ে দেবো তাকে ফাঁসী কাঠে বুলতে দেখা গেছে। আর যে ব্যক্তি এ বড়াই করেছিলো, আমি 'কাদিয়ানিয়তের ক্যালার' শেষ করে নিঃশ্বাস নেব সে এ দুনিয়ার জাহান্নামের আগুনে এমনভাবে ভস্মীভূত হয়ে গেছে, তার দেহের কোন অংশই নিরাপদ থাকতে পারে নি। খিলাফতের এ পুরস্কার খোদা প্রদত্ত একটি পুরস্কার। এটা মানবীয় চেষ্টি প্রচেষ্টায় নয় বরং খোদার হাতে প্রতিষ্ঠিত হয়। এ সংগঠন উম্মতে ওয়াহেদা বা এক উম্মতের প্রাণ। এটা শৃঙ্খলাবদ্ধ হওয়ার ভিত্তি। এটা বিজয় ও সফলতার চাবিকাঠি। এটা মু'মিনের ঈমান ও দৃঢ়বিশ্বাসের চিহ্ন।

খিলাফতের এ সংগঠন ও ব্যবস্থাপনার সাথে ইসলামের নবজীবন সম্পৃক্ত। এটাই সেই কল্যাণমণ্ডিত ঐশী সংগঠন। এর প্রতিষ্ঠার ব্যাপারে আমাদের প্রভু ও নেতা হযরত মোহাম্মদ মুস্তাফা (সাঃ) এ কথায় শুভ সংবাদ দিয়েছিলেন :

ثم تكون خلافة على منهاج النبوة  
(‘সুম্মা তাক্বুনু খিলাফাতুন ‘আলা মিনহাজিন নবুওয়াতা’)

অর্থাৎ এরপর নবুয়তের পদ্ধতিতে খিলাফত প্রতিষ্ঠিত হবে (মুসনাদ আহমদ বিন হাম্বল, ৪র্থ খন্ড, পৃঃ ২৭৩, বৈরুতে মুদ্রিত)।

আমাদের প্রতি ক্ষমা ও অনুগ্রহকারী খোদার অনুগ্রহ। তিনি আমাদের খিলাফতের এ পুরস্কার দান করেছেন। এ কথারই এটা প্রমাণ যে, ৭২ ফিরকার মোকাবেলায় এই একটি জামাতই খোদাতায়ালার দৃষ্টিতে এ পুরস্কার পাওয়ার যোগ্য এবং সিরাতে মুস্তাকীমের ওপর প্রতিষ্ঠিত। তাই আল্লাহুতায়ালার এ খিলাফতের সংগঠনের মাধ্যমে সারা বিশ্বকে এই মহান বাণীই দিয়েছেন : ওহে নিরাপত্তার দুর্বীর অশ্বেষীরা! তোমরা প্রকৃতই যদি শান্তি ও নিরাপত্তার অশ্বেষী হয়ে থাক তাহলে এ আহমদীয়া খিলাফতের সংগঠনের নিরাপত্তা প্রদানকারী ছায়ার তলে আসো। আজ এটাই তোমাদের প্রকৃত শান্তি, স্বস্তি এবং প্রকৃত জীবন দিতে পারে। এ ছায়া ছাড়া আর কোন ছায়া নেই। আসো, আর এ আধ্যাত্মিক একক সংগঠনের ছায়ায় এসে যাও। নচেৎ স্মরণ রেখো, খিলাফতকে বাদ দিয়ে তোমাদের ভাগ্যে পথভ্রষ্টতা, দুর্ভাগ্য ও বিফলতা ছাড়া আর কিছুই নেই। যুগের ইমামের এ ডাক শুনো :

قوم کے لوگو ادھر آؤ کہ نکلا آفتاب  
وادی ظلمت میں کیا بیٹھے ہو تم لیل و نہار  
صدق سے میری طرف آؤ اسی میں خیر ہے  
ہیں درندے ہر طرف، میں عافیت کا ہوں حصار

‘জাতির লোকেরা এদিকে এসো! সূর্য উদিত হয়েছে। তোমরা কেন দিনরাত অন্ধকার উপত্যকায় বসে আছ? নিষ্ঠার সাথে তোমরা আমার দিকে এসে যাও। এখানেই

কল্যাণ। চারদিকে রক্তপিপাসু জন্তুজানোয়ার বিরাজ করছে। আমিই নিরাপত্তার দুর্গ।

## জামাতের সংগঠন বা ব্যবস্থাপনা :

আমাদের প্রভু ও নেতা, খোদার বন্ধু মুহাম্মদ মুস্তাফা (সাঃ)-কে জিজ্ঞেস করা হলো, শেষ যুগে যখন মুসলমানরা ৭৩ ফিরকায় বিভক্ত হয়ে যাবে তখন সঠিক পথে বিচরণকারী এক সৌভাগ্যশালী ফিরকা আমরা কিভাবে চিনতে পারবো? সাহেবে 'জাওয়ামিউল কালীম' (বাক্বিশেষজ্ঞ) সালাল্লাহু আলায়হে ওয়া সালাম এ কঠিন প্রশ্নের উত্তর কেবল দুটি শব্দে দেন। তিনি (সাঃ) বলেন, وهى الجماعة (ওয়া হিয়াল জামাতু) অর্থাৎ সেটা হবে একটি জামাত (মুসনাদ আহমদ বিন হাম্বল, ৪ খন্ড, পৃষ্ঠা ১০২, বৈরুতে মুদ্রিত)।

খুব ভালভাবে শুনে রাখো, জামাতী ফিরকার চিহ্ন এই ঃ সেটি এক জামাত। নামেও জামাত আর কাজেও জামাত। 'জামাত' শব্দের বৈশিষ্ট্য এর মাঝে থাকবে। এ শব্দটির মাঝেই একে চেনার চাবি আছে। 'জামাত' শব্দ এমনই এক ঐক্যবদ্ধ ও সুশৃঙ্খল দলের প্রতি ইঙ্গিত করে যা সিসাগলিত প্রাচীরের ন্যায়। এর একজন অবশ্যমান্য ইমাম বা নেতা থাকে এবং জামাতের প্রত্যেক সদস্য সংগঠনের সাথে পুরোপুরি সংঘবদ্ধ থাকে। আজ বিশ্ব মানচিত্রে এ অবস্থা যদি কোন ইসলামী গোষ্ঠীতে সঠিক বলে পরিলক্ষিত হয় তাহলে তা কেবল এবং কেবল জামাতে আহমদীয়াতেই পরিলক্ষিত হয়ে থাকে। আর এটাই জামাত ও একক সংগঠনের চিহ্ন। সুশৃঙ্খল এক জামাত। এ জামাত আহমদীয়া মুসলমানদের এ উদ্দেশ্য উৎকর্ষার যুগে দান করা হয়েছে। জামাতে আহমদীয়াকে আল্লাহতায়ালার ফযল ও করম খিলাফতের সংগঠন দান করেছে। এটা নবুয়তের পদ্ধতিতেই প্রতিষ্ঠিত। খলীফা খোদাতায়াল্লা বানিয়ে থাকেন। তিনি জামাতের আধ্যাত্মিক ও সাংগঠনিক প্রধান ও এর প্রাণ। যুগ খলীফা খোদার কাছে জবাবদিহী করেন আর প্রত্যেক সদস্য খলীফার কাছে জবাবদিহী করে। জামাতে আহমদীয়ার সাথে খিলাফতের সংগঠনের অনুগত এমন এক সুদৃঢ় ও ব্যাপক জামাতী সংগঠন প্রতিষ্ঠিত হয়েছে যা প্রত্যেক দিক থেকে অতুলনীয়।

সদর আঞ্জুমানে আহমদীয়া জামাতের কেন্দ্রীয় সাংগঠনিক সংস্থা। বিভিন্ন বিভাগের জন্যে নাবারত প্রতিষ্ঠিত হয়েছে। পাকিস্তানের বাইরে তবলীগ ও ইসলাম প্রচারের জন্যে তাহরীকে জদীদের বিশাল ব্যবস্থাপনা অব্যাহত আছে। গ্রামীণ এলাকাগুলোতে

বিশেষভাবে তবলীগ ও তরবীয়তের কাজে ওয়াকফে জদীদের সংগঠন মজুদ আছে। এখন এর কাজের সীমানা বিদেশেও ব্যাপকতর হয়েছে। ধর্মীয় ও ফিকাহর বিষয়ে পথনির্দেশনার জন্যে দারুল ইফতাহ্ সংস্থা এবং কলহ বিবাদ মিটানোর জন্যে রয়েছে দারুল কাযা সংস্থা। খিলাফতের ব্যবস্থাপনার পর সবচেয়ে গুরুত্বপূর্ণ পরামর্শদাতা সংস্থা মজলিসে শূরা সারা বিশ্বে প্রতিষ্ঠিত হয়েছে। উন্নয়নশীল দেশগুলোতে শিক্ষা ও চিকিৎসাক্ষেত্রে সেবার জন্যে নূসরত জাঁহা স্কীম অব্যাহত আছে। আর্থিক বিষয়াদি দেখাশুনার জন্যে বায়তুল মালের ব্যবস্থাপনা প্রত্যেক ধাপে সুদৃঢ়ভাবে প্রতিষ্ঠিত হয়েছে। জামাতের অভ্যন্তরে পুরুষ ও নারীর ধর্মীয় শিক্ষা ও তরবীয়তের (চরিত্র গঠন) তত্ত্বাবধান ও উন্নতির জন্যে আনসারুল্লাহ, খোদামুল আহমদীয়া, আতফালুল আহমদীয়া, লাজনা ইমাইল্লাহ ও নাসেরাতুল আহমদীয়ার আলাদা আলাদা অঙ্গসংগঠন মজুদ রয়েছে। এগুলো যুগ খলীফার সরাসরি তত্ত্বাবধানে কাজ করে থাকে। এ ছাড়াও এ সুশৃঙ্খল জামাতী সংগঠনগুলোতে বহু বিভাগ প্রতিষ্ঠিত হয়েছে। এগুলো নিজ নিজ সীমার মাঝে তা'লীম (শিক্ষা) তরবীয়ত (চরিত্রগঠন), ইশায়াত (প্রচার) ও জনকল্যাণমূলক সেবা দান করে যাচ্ছে।

এ একটি খুবই সংক্ষিপ্ত ও সম্পূর্ণ চিত্র। জামাতে আহমদীয়াতে প্রতিষ্ঠিত এ এক মহান জামাতী ব্যবস্থাপনা। এটা এখন আহমদীয়াতের পঞ্চম খিলাফতে রাশেদার মাধ্যমে দুনিয়াকে দান করা হয়েছে। এর কোন দৃষ্টান্ত গোটা ইসলামী বিশ্বে বরং সারা বিশ্বের কোথাও দেখা যায় না। এ ব্যবস্থাপনা নিজ সত্তায় আহমদীয়াতের সত্যতার একটি জীবন্ত নিদর্শন। এটাই এর পরিচিত এবং এর অসাধারণ আন্তর্জাতিক উন্নতির প্রাণও বটে।

## মতভেদপূর্ণ মসলাগুলোর সঠিক মীমাংসা

হাদীসে রসূল (সাঃ)-এ উল্লেখিত حَكْمًا عَدْلًا ('হাকামান ওয়া আদলান') শব্দগুলো অনুযায়ী সাইয়েদনা হযরত মসীহ মাওউদ (আঃ) মুসলমানদের মাঝে পারস্পরিক মতভেদপূর্ণ মসলাগুলোতে আল্লাহতায়ালার কাছ থেকে জ্ঞান লাভ করে সঠিক মীমাংসা দিয়েছেন। তিনি মুসলমানদের সঠিক ইসলামী আকায়েদ বা ধর্মবিশ্বাসের তত্ত্বজ্ঞান দান করেছেন। ভুলত্রুটি সম্পর্কে অবহিত করেছেন। আর বিভিন্ন বিষয়ে তাদের ভুলত্রুটিগুলো সংশোধন করেছেন। তদুপরি যুক্তিপ্রমাণ দিয়ে সাব্যস্ত করেছেন,

এটা আসলে সঠিক ইসলামী ধর্মবিশ্বাস। ধর্মবিশ্বাসের সংশোধনীর ক্ষেত্রে জামাত বিশ্বকে যে কল্যাণ দান করেছে এর বিস্তারিত বিবরণ অতি দীর্ঘ। কয়েকটি বিষয়ের প্রতি ইঙ্গিত দিচ্ছি :

## হযরত ঈসা (আঃ)-এর মৃত্যু

মুসলমানদের মাঝে খুবই ভয়ানক ও ভিত্তিহীন এ ধর্মবিশ্বাস প্রতিষ্ঠিত হয়ে গিয়েছিল যে, হযরত ঈসা (আঃ) মারা যাননি বরং আজও আকাশে জীবিত আছেন। আর তিনিই শেষ যুগে আকাশ থেকে অবতীর্ণ হয়ে উম্মতে মুহাম্মদীয়াকে মারাত্মক বিপদাবলী থেকে রক্ষা করবেন। তাদের মুক্তিদাতা হবেন। এটা সুস্পষ্ট, এ ধর্মবিশ্বাস আঁ হযরত (সাঃ) এর উচ্চ মকামের পরিপন্থী ও অবমাননাকর। কেননা এথেকে এটা প্রমাণিত হয়, রসূলে করীম (সাঃ) তো দুঃখকষ্টের চাকায় নিষ্পেষিত হয়েছিলেন- শি'বে আবি তালিবের ঘটনা হোক, মদীনায় হিজরত হোক, তায়েফে সফর হোক, উহুদের যুদ্ধে ও হুনায়েনের ঘটনায়ই হোক- এসব ঘটনায় আল্লাহতায়ালা, নাউযুবিল্লাহ তাঁকে সাহায্য সমর্থন করেননি আর যখন হযরত ঈসা (আঃ)-এর ওপর বিপদ আঘাত হানলো তখন খোদাতায়ালা তার ভালবাসা শক্তি ও মহিমায় উদ্দীপনা সৃষ্টি হলো এবং হযরত ঈসা মসীহ (আঃ)-কে আকাশে উঠিয়ে নেয়া হলো। তিনি এখনও জীবিত আছেন। আর শেষ যুগে উম্মতে মুসলেমা যখন সব দিক থেকে আক্রান্ত হবে, দাজ্জালী শক্তি সব দিক থেকে যখন এর ওপর চড়াও হবে তখন এই ইসরাঈলী নবীই তাদের মুক্তিদাতা হিসেবে আসবেন। এটা এমন এক ধর্মীয় বিশ্বাস যা নিয়ে খৃষ্টানরা আঁ হযরত (সাঃ)-এর মোকাবেলায় হযরত মসীহ নাসেরী (আঃ)-এর শ্রেষ্ঠত্ব প্রমাণ করে ও মুসলমান নিজেদের উদ্ভাবিত ঋটিপূর্ণ ধর্মীয় বিশ্বাসের ভিত্তিতে কোন উত্তর দিতে সমর্থ হয় না।

আহমদীয়াত এলো আর ইসলামী বিশ্বকে এ ভুল ধারণা থেকে মুক্তি দিলো। হযরত মসীহ মাওউদ (আঃ) বিশ্বের সামনে এটা ব্যাখ্যা করলেন, মসীহ (আঃ) জীবিত থাকার বিশ্বাস সম্পর্কে কুরআন মাজীদ ও সহী হাদীসের কোথাও কোন উল্লেখ নেই। বরং কুরআন মাজীদের ৩০ টি আয়াত ও অসংখ্য হাদীস থেকে তাঁর স্বাভাবিক মৃত্যু সাব্যস্ত হয়। বুদ্ধিবিবেকের প্রেক্ষাপটেও মসীহ (আঃ)-এর জীবিত থাকার বিশ্বাস আল্লাহতায়ালা গুণাবলীর পরিপন্থী, শিরক সৃষ্টিকারী এবং রসূলে করীম (সাঃ) পবিত্র মর্যাদাকে হেয় প্রতিপন্নকারী বিশ্বাস। ঐতিহাসিক সাক্ষ্য প্রমাণাদি ও বর্তমান

যুগের নতুন নতুন আবিষ্কার থেকেও ঈসা (আঃ)-এর মৃত্যুর সমর্থন পাওয়া যায়। আহমদীয়াত বিশ্বকে এ সুসংবাদ শুনিয়েছে আজ মুসলিম উম্মত নিজের সংশোধন ও পথনির্দেশনার জন্যে অন্য কোন জাতির নবীর মুখাপেক্ষী নয়। বরং সত্য কথা তো এই, আজ প্রত্যেক উম্মত ও গোটা মানবতা নিজের সংশোধনের জন্যে মুহাম্মদী উম্মতের মুখাপেক্ষী। অতএব আনন্দে উদ্দীপ্ত হও আর কৃতজ্ঞতার সিজদা করো। আজ মোহাম্মদ (সাঃ)-এর গোলামদের মাঝ থেকে এ প্রতাপপূর্ণ আধ্যাত্মিক সন্তানকে আল্লাহতায়ালা আহমদ (সাঃ)-এর গোলাম হিসেবে পাঠিয়েছেন যাকে প্রভু ও নেতা মোহাম্মদ (সাঃ)-এর চরণ সেবার কল্যাণে যুগের ইমাম বানানো হয়েছে। দেখো আর শুনো আর বিশ্বকে বলে দাও :

برتر گمان و وہم سے احمد کی شان ہے  
جس کا غلام دیکھو مسیح الزمان ہے

অনুমান ও ধারণার অতীত আহমদ (সাঃ)-এর মর্যাদা,  
যাঁর গোলাম দেখো যুগের মসীহ হয়েছে ॥

## খতমে নবুয়তের প্রকৃত তাৎপর্য

খতমে নবুয়তের কল্যাণের প্রসঙ্গেও মুসলমানদের ভুল ধারণা দেখতে পাওয়া যেতো। আজও বিপুলভাবে মুসলমানদের মাঝে এ ধর্মবিশ্বাস দেখতে পাওয়া যায়, যে সত্ত্বাকে খোদাতায়ালা সারা জগতের জন্য করুণার কারণ করে বানিয়ে পাঠিয়েছিলেন তিনি এসে করুণাকে ব্যাপকতর করার বদলে খোদার করুণার উচ্চতর উৎস নবুয়ত সব সময়ের জন্য বন্ধ করে দিয়েছেন। যে পুরস্কারের প্রতিশ্রুতি খোদাতায়ালা একটি শুভ সংবাদস্বরূপ মু'মিনদের দিয়েছেন এর দরজা সর্বের রুদ্ধ করে দেওয়া হয়েছে। এর চেয়ে অধিক ভয়ানক ও ক্ষতিকারক এবং রসূলে পাক (সাঃ)-এর আধ্যাত্মিক উন্নতি ও উচ্চ মর্যাদার পরিপন্থী আর কোন ধর্মবিশ্বাসের চিন্তা করা যায় কি? খাতামান্নাবীঈন-এর প্রকৃত তাৎপর্য বুঝা ছাড়া কেবল শব্দের ভিখারী মুসলমানরা নিজেদের ভুলঋটিপূর্ণ চিন্তাচেতনার ফলে দু'জগতের করুণাসিদ্ধ হযরত মুহাম্মদ মুস্তাফা (সাঃ)-এর পবিত্র মর্যাদার প্রতি অবমাননা ও কুরুটিপূর্ণ বক্তব্যের সুযোগ

নিজেরাই খুঁটানদের যুগিয়ে দিয়েছে। কিন্তু পরিতাপের বিষয়, তাদের আত্মাভিমান জাহ্রত হয় নি। আর তাদের চিন্তাভাবনা ও চেষ্টাপ্রচেষ্টার সংশোধনেরও সৌভাগ্য ঘটে নি।

সৈয়দনা হযরত মসীহ মাওউদ (আঃ) খতমে নবুয়তের সঠিক তাৎপর্য সম্বন্ধে বজ্রকণ্ঠে এ ঘোষণা করেছেন, আমাদের প্রভু ও নেতা হযরত খাতামান্নাবীঈন মুহাম্মদ মুস্তাফা (সাঃ) বিশ্বের প্রত্যেক নবীর চেয়ে শ্রেষ্ঠ ও মহিমান্বিত এবং অধিকতর সম্মানিত। সারা বিশ্বের মুক্তি তাঁর আঁচলের সাথে সম্পৃক্ত। তাঁর (সাঃ) আধ্যাত্মিক কল্যাণ কিয়ামত পর্যন্ত প্রবহমান ও স্থায়ী। এখন প্রত্যেক আধ্যাত্মিক পুরস্কার ও কল্যাণ তাঁর (সাঃ) দাসত্বে শর্তযুক্ত করে দেওয়া হয়েছে। যে চাইবে সে তাঁর (সাঃ) ওসীলায় (অর্থাৎ মাধ্যমে) পাবে। আর যে এ দরজা থেকে পায় না সে চিরস্থায়ীভাবে বঞ্চিত। হযরত মসীহে পাক (আঃ) বলেন :

‘আমরা যখন ন্যায় বিচারের সাথে লক্ষ্য করি তখন গোটা নবুয়তের ধারায় উচ্চ মর্যাদার যুবক পুরুষনবী জীবিত নবী এবং খোদার উচ্চ মার্গের প্রিয় নবী কেবল এক ব্যক্তিকে জানতে পারি অর্থাৎ সেই নবীদের সর্দার, রসূলদের গর্ব, রসূলদের মুকুট, যাঁর নাম মুহাম্মদ মুস্তাফা ও আহমদ মুজতাবা (সাঃ)। তাঁর ছায়ায় ১০ দিন চললে সেই জ্যোতি লাভ হয় যা তাঁর আগে হাজার হাজার বছরে লাভ হতে পারতো না’ (রুহানী খাযায়েন, লন্ডনে মুদ্রিত, ১৯৮৪, ১২ খন্ড, সিরাজে মুনীর, পৃঃ ৮০)।

তিনি (আঃ) আরো বলেন : ‘আল্লা জাল্লা শানুহু আঁ হযরত (সাঃ)কে সাহেবে খাতাম বা মোহরের অধিকারী বলেছেন। অর্থাৎ তাঁর (সাঃ) উৎকর্ষ বিস্তার দেয়ার জন্যে মোহর দেয়া হয়েছে। কোন নবীকে কখনও এটা দেয়া হয়নি। এজন্যই তাঁর (সাঃ) নাম খাতামান্নাবীঈন অর্থাৎ তাঁর (সাঃ) পরিপূর্ণ অনুসরণে নবুয়ত দান করা হয়ে থাকে। তাঁর আধ্যাত্মিক দৃষ্টি নবী সৃষ্টিকারী। এ পবিত্রকরণ শক্তি অন্য কোন নবীকে দেয়া হয় নি’ (রুহানী খাযায়েন, লন্ডনে মুদ্রিত ১৯৮৪, ২২ খন্ড, হাকীকাতুল ওহী, পৃঃ ১০০, টীকা)।

## কুরআন মাজীদের উচ্চ মর্যাদা

কুরআন করীমের মহান পুরস্কার মুসলিম উম্মতকে দান করা হয়েছে। কিন্তু পরিতাপের বিষয়, আহমদীয়াতের বিকাশের সময় জ্ঞান, তত্ত্বজ্ঞান ও পথনির্দেশনার প্রস্রবণ এ কিতাব একটি গেলাফাবৃত কিতাব হিসেবে রয়ে গিয়েছিলো। একে পুরনো

কিচ্ছাকাহিনীর কিতাব আখ্যায়িত করা হতো। কোন কোন লোক রসূলের (সাঃ) হাদিসকে খোদার কথার ওপর প্রাধান্য দিতে আরম্ভ করলো। কতই দুর্ভাগ্য, যে কিতাব তত্ত্বজ্ঞানের ভান্ডার ও মানুষের পথপ্রদর্শনের জন্যে সৃষ্টি করা হয়েছিলো অকৃতজ্ঞ মুসলমান এর মাহাত্ম্য ও কল্যাণ থেকে একেবারেই বঞ্চিত হয়ে গেলো! এমন সময়ে আহমদীয়াতের আগমন হলো। হযরত মসীহে মাওউদ (আঃ)-এর আবির্ভাব হলো। তিনি কুরআন মাজিদের প্রকৃত সৌন্দর্য ও লাভণ্য সম্বন্ধে বিশ্বকে জানালেন। তিনি কুরআন মাজিদকে একখানা জীবিত কিতাব হিসেবে উপস্থাপন করলেন। কুরআন মনসুখ হওয়ার ধর্মবিশ্বাসকে তিনি শক্তিশালী যুক্তিপূর্ণ দিয়ে বাতিল করলেন। আর প্রমাণ করলেন, এ মহান কিতাবের এক একটি শব্দ খোদাতাআলার পক্ষ থেকে অবতীর্ণ। এর একটি অক্ষরের কথাও কিয়ামত পর্যন্ত মনসুখ (রহিত) বা পরিবর্তন হতে পারে না। এ কিতাব জ্ঞান তত্ত্বজ্ঞানের ভান্ডার এবং সারা বিশ্বের মুক্তির উৎস। তিনি (আঃ) বলেছেন:

‘নিশ্চিত এটা মনে করো, যেভাবে চোখ ছাড়া দেখা সম্ভব নয় বা কান ছাড়া শুন্য সম্ভব নয় অথবা জিহ্বা ছাড়া কথা বলা সম্ভব নয় এভাবে কুরআন ছাড়া প্রিয় খোদার মুখ দেখাও সম্ভব নয়’ (রুহানী খাযায়েন, লন্ডনে মুদ্রিত, ১৯৮৪, ১০ খন্ড, ইসলামী উসুল কি ফিলাসফী, পৃষ্ঠা ১২৮-১২৯)। তিনি (আঃ) তাঁর জামাতকে উপদেশ দিতে গিয়ে বলেন:

‘তোমাদের জন্যে একটি আবশ্যকীয় শিক্ষা এই, কুরআনকে অপ্রয়োজনীয় দ্রব্যের ন্যায় নিষ্ক্ষেপ করো না। এতে তোমাদের জীবন। যে-ব্যক্তি কুরআনকে সম্মান করবে সে আকাশে সম্মান লাভ করবে। যে-ব্যক্তি প্রত্যেক হাদীস ও প্রত্যেক কথার ওপর কুরআনকে প্রাধান্য দিবে তাকে আকাশে প্রাধান্য দেয়া হবে। মানবমন্ডলীর জন্যে পৃথিবীতে এখন কুরআন ছাড়া কোন কিতাব নেই। আর মানব সন্তানের জন্যে এখন মুহাম্মদ (সাঃ) ছাড়া কোন রসূল ও শাফাআতকারী নেই’ (রুহানী খাযায়েন, লন্ডনে মুদ্রিত, ১৯৮৪, ১৯ খন্ড, কিশতিয়ে নুহ, পৃষ্ঠা ১৫)।

কুরআন মাজীদের সাথে প্রকৃত ভালবাসার প্রতি তাগিদপূর্ণ বর্ণনা করে বলেন : ‘মুক্তির পথ কুরআন দেখিয়েছে। আর অন্যান্য সব ছিলো এর ছায়ামূর্তি। সুতরাং তোমরা গভীরভাবে কুরআন পড়ো। একে খুবই ভালবাসো। এমনভাবে ভালবাসো যে, এমনভাবে আর কাউকে ভালবাস নি।’ (রুহানী খাযায়েন, লন্ডনে মুদ্রিত, ১৯৮৪, ১৯ খন্ড, কিশতিয়ে নুহ, পৃষ্ঠা ২৮)

হযরত মসীহ মাওউদ (আঃ) ও তাঁর খলীফাগণ কুরআন মাজীদের এমন মহান সেবা করেন, তত্ত্বজ্ঞানের মূল্যবান রহস্য ও মর্যাদা বর্ণনা করেন এবং নিজেদের জামাতে কুরআনের সেবা ও কুরআনের প্রতি ভালবাসার এমন আবেগ উদ্দীপনা সৃষ্টি করেন যা অন্যেরাও স্বতঃস্ফূর্তভাবে স্বীকার করতে বাধ্য হয়েছে। মিয়ৌ মুহাম্মদ আসলাম নামক একজন অ-আহমদী সাংবাদিক আহমদীয়াতের কেন্দ্র কাদিয়ানে গিয়ে যা কিছু দেখেছেন এর বর্ণনা দিতে গিয়ে লেখেন :

“কুরআন মাজীদের ব্যাপারে যতটা আন্তরিক ও যথার্থ ভালবাসা কাদিয়ানের জামাতের মাঝে আমি দেখেছি আর কোথাও তা দেখিনি। কাদিয়ানের আহমদীদের সাথে আমি কেবল কুরআনই কুরআন দেখেছি.....যে দিকেই দৃষ্টি দিতাম কুরআন দেখতে পেতাম। মোট কথা কাদিয়ানের আহমদী জামাত.....এমন জামাত যা বিশ্বে কার্যত আন্তরিকভাবে আল্লাহর উদ্দেশ্যে কুরআন মাজীদের অনুসারী ও ইসলামের জন্যে বিলীন।”

(আল্ বদর, কাদিয়ানের বরাতে, ১৩ মার্চ, ১৯১৩, ১৩খন্ড, নম্বর ২, পৃষ্ঠা ৬-৯)।

আহমদীদের অন্তরে কুরআন মাজীদের প্রতি সত্যিকারের ভালবাসার একটি ঈমানবর্ধক দৃষ্টান্ত এ অধ্যম লন্ডনে দেখেছে। আমাদের একজন ইংরেজ নিষ্ঠাবান আহমদী মরহুম দাউদ সামারিজ সত্তর বছর বয়সে সত্যিকারের ভালবাসা ও বিশ্বাসের সাথে কুরআন শিক্ষা আরম্ভ করেন। যখন দশ পারা দিয়ে নিজের অন্তরকে জ্যোতির্ময় করেছিলেন তখন তার শেষ সময় এসে গেলো।

মোট কথা আহমদীয়াত ভুলক্রটিপূর্ণ ধর্মীয় বিশ্বাসের মূলোৎপাটন করতে গিয়ে বিশ্বকে এসব সত্যিকারের ধর্মীয় বিশ্বাস ও দৃষ্টিভঙ্গির সাথে পরিচয় করিয়ে দেয় যা খোদাতাআলার মাহাত্ম্য, ইসলামের মর্যাদা ও রসূলে খোদা সাল্লাল্লাহু আলায়হে ওয়া সাল্লামের উচ্চ মার্গ সাব্যস্তকারী ছিলো। এভাবে যুগের ন্যায় বিচারক ও মীমাংসাকারী হযরত মসীহ মাওউদ (আঃ)-এর চেহারা কলঙ্ক থেকে পবিত্র ও পরিচ্ছন্ন করে দেয় এবং তাঁর আবির্ভাবের পরম উদ্দেশ্য পূর্ণ হয়। তিনি (আঃ) বলেছেন :

“খোদা আমাকে পাঠিয়েছেন যেন আমি এ কথায় সাক্ষ্য দিই, কুরআন জীবন্ত কিতাব আর জীবন্ত ধর্ম ইসলাম এবং জীবন্ত রসূল মুহাম্মদ মুস্তাফা (সাঃ)” (মজমুয়া ইশতাহারাত, লন্ডনে মুদ্রিত, ১৯৮৪, ৩য় খন্ড, পৃষ্ঠা ২৬৭, ইশতিহার ২৫-৫-১৯০০)।

এ তিনটি মৌলিক বিষয় ছাড়াও আহমদীয়াত মুসলমানদের মাঝে বর্তমান ভুলক্রটিপূর্ণ ধর্ম বিশ্বাসগুলো সংশোধন করেছে। আর সিরাতে মুস্তাকীমে মুসলমানদের পথপ্রদর্শন করেছে। এর মাঝে হযরত ইমাম মাহুদীর আগমন, দাজ্জালের তাৎপর্য, জেহাদ সম্বন্ধে সঠিক ইসলামী দর্শন, প্রকৃত তৌহীদ, কুরআন ও হাদীসের মর্যাদা ও গুরুত্ব প্রভৃতি অসংখ্য বিষয় নিহিত। এগুলো জামাতী সাহিত্যাদিতে মজুদ আছে।

## রুহানী খাযায়েন (আধ্যাত্মিক ভান্ডার)

هُوَ الَّذِي أَرْسَلَ رَسُولَهُ بِالْهُدَىٰ وَدِينِ الْحَقِّ لِيُظْهِرَهُ عَلَى الدِّينِ كُلِّهِ وَلَوْ كَرِهَ الشَّاكِرُونَ

(হয়াল্লাযী আরসালা রসূলাহ্ বিল হুদা ওয়া দীনিল হাক্কি লিইউযহিরাহু

আলাদীন কুল্লিহি ওয়া লাও কারিহাল মুশরিকূন) (সূরা সাফ্ফঃ ১০)

আয়াতে করীমা অনুযায়ী আগমনকারী প্রতিশ্রুত ব্যক্তি ইসলামকে বিশ্বের বিভিন্ন স্থানে বিজয় দানের যে মাধ্যম হবেন এটা নির্ধারিত ছিল। হযরত মসীহ মাওউদ (আঃ)-এর মাধ্যমে এ ভবিষ্যদ্বাণী বড়ই মাহাত্ম্য ও মর্যাদার সাথে পূর্ণ হয়েছে। এর একটি জাঁকজমকপূর্ণ দৃষ্টান্ত ছিলো মহান সর্বধর্ম সম্মেলন। ১৮৯৬ সনে লাহোরে এটা অনুষ্ঠিত হয়েছিলো। এতে নির্ধারিত ৫টি বিষয়ের জবাবে হযরত মসীহ মাওউদ (আঃ) ‘ইসলামী উসুল কি ফিলাসফী’ এমন সুন্দরভাবে বর্ণনা করেন যে, সকলেই একে উচ্চকণ্ঠে স্বীকৃতি দেন -এ প্রবন্ধ সবার ওপরে ছিলো। আল্লাহতাআলা হযরত মসীহ মাওউদ (আঃ) কে তাঁর পক্ষ থেকে জ্ঞান ও তত্ত্ব দান করেন ও এর বর্ণনায় পরম হৃদয়গ্রাহী এবং প্রভাবশালী হওয়ার রহস্য শিখিয়ে দেন। তাঁর কথায় এমন অসাধারণ প্রভাব ছিলো যে, অন্তরগুলো বিমোহিত করতে থাকতো। বিরুদ্ধবাদীরাও এ কথা স্বীকার করেছে। তাঁর (আঃ) মৃত্যুর পর হিন্দুস্তানের নেতা মাওলানা আবুল কালাম আজাদ তো তাঁকে এক বিজয়ী বলে আখ্যায়িত করেন।

তাঁকে প্রদত্ত এ জ্ঞানবুদ্ধি আসলে সেই ঐশী অস্ত্র যা মিথ্যা সব দুর্গকে ধ্বংস করে চলে যাচ্ছে। তাঁর অদ্বিতীয় প্রভাবগুলোর এ অবস্থা যে, তাঁর মৃত্যুর পরেও এ ক্ষয়হীন জ্ঞানবুদ্ধি ইসলামের বিশ্ব বিজয়ের এক সফল মাধ্যম সাব্যস্ত হতে যাচ্ছে। জানা কথা, এ সমুদ্র থেকে আহমদী মুবাল্লেগণ তো উপকৃত হচ্ছেনই অ-আহমদী আলেমরাও হযরত মসীহ মাওউদ (আঃ)-এর লেখা তাদের বর্ণনায় ও লেখায় বেশি

বেশি ব্যবহার করছেন। কিন্তু উদ্ধৃতি দেওয়ার সাহস রাখেন না। এটা হলো সেই শক্তিশালী জ্ঞানবুদ্ধির কথা যা আহুদীয়াত বিশ্বকে দিয়েছে। প্রত্যেক মোকাবেলার ক্ষেত্রে বিজয়ের নিশ্চয়তা রয়েছে। বিশেষ করে খ্রীষ্টানদের মোকাবেলায় হযরত মসীহ মাওউদ (আঃ)-এর যুক্তিপ্রমাণ তো এমন এক পাথর সদৃশ শক্তিশালী যার জবাব তারা কখনই দিতে পারবে না। রসূলে পাক (সাঃ) আগমনকারী প্রতিশ্রুত ব্যক্তিকে 'ক্রুশ ধ্বংসকারী' বলে নির্ধারিত করেছেন। এর মর্যাদাপূর্ণ প্রকাশ হযরত মসীহ মাওউদ (আঃ)-এর জীবনে এবং পরে প্রত্যেক যুগে বড়ই মর্যাদার সাথে পরিদৃষ্ট হয়। হযরত মসীহ মাওউদ (আঃ) তাঁর অব্যর্থ যুক্তিপ্রমাণ দিয়ে পাদ্রী লেফ্রাইকে এমন নিরুত্তর করে দেন যে, মৌলভী নূর মুহাম্মদ সাহেব স্বীকার করেছেন, তিনি তো 'হিন্দুস্তান থেকে নিয়ে বিলাত পর্যন্ত পাদ্রীদের পরাজিত করে দেন' (ভূমিকা : মু'জেযনুমা কালাঁ, কুরআন শরীফের তরজমা, ১৯৩৪ সনে ছাপা, পৃষ্ঠা ৩০)।

হযরত মসীহে মাওউদ (আঃ) বিশ্বকে যে আধ্যাত্মিক ভাঙার দিয়েছেন তা ৯০ খানারও অধিক পুস্তকাকারে প্রকাশিত হয়েছে। তাঁর পর তাঁর (সাঃ) খলীফাগণ এ ধারাকে অব্যাহত রাখেন। আর তত্ত্বপূর্ণ পুস্তকাকারে নতুন নতুন জ্ঞান বিশ্বকে সরবরাহ করতে থাকেন। জামাতের আলোমগণ ও এ সুমিষ্ট বর্ণা থেকে কল্যাণ লাভ করে মহান পুস্তকাদি প্রণয়ন করে বিশ্বকে উপহার দিয়েছেন। ৫৭টি (নোট: ২০১২ সালের শেষে ৭০টি) ভাষায় কুরআন করীমের অনুবাদ প্রচার, কুরআনের ব্যাখ্যা, হাদিসের ব্যাখ্যা, বিভিন্ন ইসলামী বিষয়ে পুস্তক প্রণয়ন, বর্তমান যুগের সমস্যাবলীর বিষয়ে পুস্তক রচনা করে প্রকাশ, বিশ্বের বিভিন্ন ভাষায় এসব পুস্তকাদির অনুবাদ, কেন্দ্রীয় জামাতের বাইরে বিভিন্ন দেশ থেকে প্রকাশিত পত্রপত্রিকা ও সাময়িকী-এসব আহুদীয়াতের জ্ঞানবিষয়ক ও আধ্যাত্মিক কল্যাণের স্রোত-স্বিনী ধারা। এটা সদা তীব্র বেগে বয়ে চলেছে। আহুদীয়াত বিশ্বকে যে জ্ঞান ও তত্ত্বের এ মহান সম্পদ দান করেছে এর প্রতি ইঙ্গিত করতে গিয়ে হযরত মসীহ মাওউদ (আঃ) খুবই সুন্দর বলেছেন :

'আমাকে যা দেওয়া হয়েছে তা ভালবাসার মালিকের সাম্রাজ্য আর ঐশী তত্ত্ব-জ্ঞানের ভাঙার। আল্লাহুতাআলার আশিসক্রমে এতো দেবো যে, লোকেরা নিতে নিতে ক্লান্ত হয়ে যাবে' (রুহানী খাজায়েন, লন্ডনে মুদ্রিত, ১৯৮৪, ৩ খন্ড, পৃষ্ঠা ৫৬৬, ইয়লায়ে আওহাম)।

এ ঘোষণা পাঠ করার পর মস্তিষ্ক তখন তখনই নবী (সঃ)- এর সেই হাদীসের প্রতি ধাবমান হয় যাতে এ ভবিষ্যদ্বাণীর উল্লেখ ছিলো,

يُفِيضُ الْمَالَ حَتَّى لَا يَقْبَلَهُ أَحَدٌ

(ইউফিযুল মালা হাত্তা লা ইয়াক্ব বালাহু আহাদুন)

(বুখারী, কিতাবু ব'দাল খালাক্ব, বাব নুযুলে ঈসা ইবনে মারইয়াম আলায়হেস সালাম)।

অর্থাৎ, আগমনকারী মসীহু এত ধনসম্পদ বিতরণ করবেন যে, নেওয়ার কোন লোক পাওয়া যাবে না। আজ এ ভবিষ্যদ্বাণী মহান মর্যাদার সাথে পূর্ণ হয়েছে। মুহাম্মাদী মসীহু জ্ঞান ও তত্ত্বের ভাঙার পানির মত বইয়ে দিয়েছেন এবং বিশ্বকে প্লাবিত ও তরতাজা করে দিয়েছেন। তিনি খুব সুন্দরই বলেছেন :

وه خزانٌ جو هزاروں سال سے مدفون تھے

اب میں دیتا ہوں اگر کوئی ملے امیدوار

'সেই ভাঙার যা হাজার হাজার  
বছর ধরে গুপ্ত ছিলো,  
এখন আমি দিচ্ছি যদি  
পাওয়া যায় কোন প্রত্যাশী'।

সেবার ক্ষেত্রে উৎসাহব্যঞ্জক কর্মকাণ্ড

আহুদীয়াত বিশ্বকে কী দিয়েছে? প্রশ্ন তো এই, পুণ্য ও সুন্দরের ক্ষেত্রে জামাতে আহুদীয়াত কোন জিনিসটি বিশ্বকে দেয় নি? কোন জামাত বা জাতির সম্পদ তো হয়ে থাকে এর লোকবল। এদের সম্মিলিত অবস্থার নামই 'জামাত'। আল্লাহুতাআলার নিজ হাতে প্রতিষ্ঠিত এই জামাতকে এমন বিরল জনশক্তি দান করেছেন যার সংখ্যা নিজেদের সততা ও বৈশিষ্ট্যের দিক থেকে প্রতিদিন বৃদ্ধি পেয়ে চলেছে। জামাতে আহুদীয়াত প্রত্যেক ব্যক্তি প্রত্যেক স্থানে মানবতার সেবার আবেগে ভরপুর হয়ে

নিজ নিজ দেশে জাতি ও মানবতার সেবায় নিযুক্ত আছে। প্রত্যেক দেশে জামাতে আহমদীয়া সমাজের সেবায় পরিপূর্ণভাবে অংশ নিচ্ছে। সাধারণ সেবা ছাড়াও যার স্বীকৃতি সবখানে করা হয়ে থাকে, এ জামাতের ইতিহাস সাক্ষী দেয়, জামাতের খলীফাগণ ও নেতৃবৃন্দ এবং জামাতের এমন সব ব্যক্তিত্ব যাঁদের আল্লাহুতাআলা বিভিন্ন ক্ষেত্রে উন্নত জীবনের বৈশিষ্ট্যপূর্ণভাবে পদ দান করেছেন তাঁরা জাতি, দেশ এবং মানবতার কল্যাণে নিজেদের সেবা সব সময় উৎসর্গ করে রেখেছেন।

প্রশ্নকারীরা প্রশ্ন করে, আহমদীয়াত বিশ্বকে কী দিয়েছে? আমি বলি, আহমদীয়াতের ইতিহাসের প্রতি দৃষ্টি দাও আর দেখো, কিভাবে এ জামাত নিজের কলিজার টুকরো সন্তানদের বিশ্বের সেবায় উৎসর্গ করেছে। সেবার যে কোন ক্ষেত্রে জামাতের এমন সব সুপুত্র পূর্ব ও পশ্চিমের প্রতি ক্ষেত্রে এক সুস্পষ্ট মর্যাদা অক্ষুণ্ণ রেখেছে। ভাষার জগতে হযরত শেখ মুহাম্মদ আহমদ মযহারের সেবা, আফ্রিকার উন্নতি ও গঠনের ক্ষেত্রে শেখ উমরী আবিদীর সেবা, পাকিস্তানের বৈষয়িক ও অর্থনৈতিক উন্নতি ও দৃঢ়তার ক্ষেত্রে হযরত সাহেবযাদা মির্যা মুজাফফর আহমদের সেবা এবং দেশের প্রতিরোধ ও সুরক্ষার ক্ষেত্রে লেফটেনেন্ট জেনারেল আখতার হুসায়ন মালিক, লেঃ জেঃ আব্দুল আলী মালিক ও ফুরকান ফৌজের মুজাহিদগণের সেবা কিভাবে কোন ভদ্রলোক অস্বীকার করতে পারেন? বিজ্ঞানের ক্ষেত্রে ডঃ অধ্যাপক আব্দুস সালাম যে কাজ করেছেন এবং যে সুনাম অর্জন করেছেন তা বলার অপেক্ষা রাখে না। পাকিস্তানের এ সুযোগ্য সন্তান নোবেল পুরস্কার লাভ করে কেবল পাকিস্তানেরই নয় বিশ্ব মুসলিমের শির গর্বে উন্নীত করেছেন। আবার পুরস্কারের সাকল্য অর্থ প্রিয় জন্মভূমি ও বিজ্ঞানের ব্যাপকতার জন্যে উৎসর্গ করে কুরবানীর এক অতুলনীয় উজ্জ্বল দৃষ্টান্ত স্থাপন করেছেন।

এ আহমদী বৈজ্ঞানিক মুসলমানদের একটি সাহস ও সংকল্প দান করেছেন, আস্থা দান করেছেন এবং উন্নতির আবেগ দান করেছেন। প্রিয় জন্মভূমির স্থায়িত্ব ও দৃঢ়তার সেবা, আন্তর্জাতিক বলয়ে ন্যায়-বিচার ও আইনী সেবা আর সবচেয়ে বেশি এই সেবা যে, অসংখ্য ইসলামী রাষ্ট্রের স্বাধীনতার পুরস্কারের সৌভাগ্য লাভে হযরত চৌধুরী মুহাম্মদ জাফরউল্লাহ খান সাহেব (রাঃ)-এর সেবা বিশ্বের ইতিহাসে সোনালী অক্ষরে লেখা হয়েছে। এমন কোন শিক্ষিত লোক আছেন কি যিনি আহমদীয়াতের এসব সুসন্তানের ব্যাপক নিঃস্বার্থ ও বৈশিষ্ট্যমণ্ডিত সেবা সম্বন্ধে না জানার সাহস দেখাতে পারেন? কেবলমাত্র সেসব অন্ধ মোল্লা ছাড়া যাদের সম্পর্কে

পাকিস্তানের উচ্চ আদালতের প্রধান বিচারপতি মুনীরকে এ কথা বলতে হয়েছিলোঃ 'চৌধুরী জাফরউল্লাহ খান মুসলমানদের খুবই নিঃস্বার্থ সেবা দান করেছেন। তবুও কোন কোন দল তদন্ত আদালতে যেভাবে তাঁর উল্লেখ করেছে তা লজ্জাজনক অকৃতজ্ঞতার প্রমাণ বহন করে'।

(তদন্ত আন্দোলনে রিপোর্ট, পাঞ্জাব দাঙ্গা ১৯৫৩ পৃষ্ঠা ২০৯, পাঞ্জাব সরকার কর্তৃক প্রকাশিত)।

কোন কোন ক্ষেত্রে আহমদী উৎসর্গীকৃত সন্তানদের কোন কোন সেবার কথা উল্লেখ করবো? এসব সেবা তো পৃথিবীর কোণে কোণে ছড়িয়ে রয়েছে। এসব ইতিহাসের এমন অংশে পরিণত হয়েছে যেগুলো অবশ্যই মিটানো যেতে পারে না।

ثبت است بر جريرة عالم دوام ما

'পৃথিবীর মানচিত্রে আমাদের কীর্তি অপ্রান রয়েছে।'

## নিঃস্বার্থ জনসেবা :

আহমদীয়াত বিশ্বকে কী দিয়েছে? বিভিন্ন দিক থেকে এর বিভিন্ন জবাব দেওয়া যেতে পারে। একটি দিক তো এই, আহমদীয়াত নিজের সব কিছু বিশ্বকে দিয়ে দিয়েছে। সব রকম পুরস্কার যা খোদাতাআলা জামাতকে দিয়েছেন জামাত সে পুরস্কার বিশ্বের সফলতা ও কল্যাণের ক্ষেত্রে ব্যয় করতে ও দিতে কখনোও কার্পণ্য করেনি। কেননা, কৃপণতা ও হীনমন্যতার দৃষ্টিভঙ্গী এ জামাতের স্বভাবে নেই। জামাতে আহমদীয়া এমনিতেই তো একটি সেবক জামাত। একটি নিঃস্বার্থ সেবক, একটি ক্রান্তিহীন সেবক জামাত, এটা এ নীতির ওপর সদা কর্মরত ভালবাসা সবার তরে- ঘৃণা নয়কো কারো 'পরে' অতএব এ জামাত নিজের সব কিছু বিশ্বকে দিয়েছে। খোদা যেসব পুরস্কার দিয়েছেন এর সবটাই মানবমন্ডলীর সেবায় উৎসর্গ করে রেখেছে।

আহমদীয়াতের ইতিহাস এর সাক্ষী। যখনই সেবার কোন ক্ষেত্র দৃষ্টিতে এসেছে জামাতে আহমদীয়ার নির্ভীক সেবকগণ সদা নিঃস্বার্থ সেবার আবেগ নিয়ে, ধর্ম জাতি নির্বিশেষে সে ক্ষেত্রে লাফিয়ে পড়েছে। জামাতের সংখ্যা স্বল্প। আর সম্পদও সীমাবদ্ধ। আর্থিক ক্ষেত্রে জামাত কোন সরকারের কখনও সাহায্য নেয়

না। আর এর প্রত্যাশীও নয়। তাদের সারা মূলধন তো তাদের সেই চাঁদা যা জামাতের সেই উৎসর্গীকৃত সদস্যগণ বড়ই পরিশ্রমে অর্জিত আয় থেকে নিজেদের পেট কেটে, নিজেদের প্রয়োজনকে কাটছাটি করে জামাতের ঝুলিতে ভরে দেন। এ স্বল্প সম্পদ সত্ত্বেও জনসেবার ক্ষেত্রে সব জায়গায় এ জামাতকেই রাত দিন কর্মচঞ্চল পরিলক্ষিত হয়। আফ্রিকার যে কোন দেশে দুর্ভিক্ষ ও খরার পরীক্ষা আসুক, গুজরাতের ভূমিকম্প প্রসীড়িত লোকদের প্রয়োজন দেখা দিক, পাকিস্তানে প্লাবনে আক্রান্ত লোকদের সাহায্যের প্রশ্ন আসুক, (এবং সুনামী প্রসীড়িত ইন্দোনেশিয়ার দ্বীপপুঞ্জের সাহায্যের প্রশ্ন আসুক- অনুবাদক) জামাতে আহমদীয়ার স্বেচ্ছাসেবীগণকে সেবার ঝাড়া সমুল্লত করে অবনত মস্তকে সেবায় নিয়োজিত দেখা যায়। জামাতের আন্তর্জাতিক **Humanity First** সেবা কোন স্থানে পিপাসার্ত লোকদের স্বচ্ছ পানি সরবরাহ করছে, কোথাও অন্ধ লোকদের দৃষ্টিশক্তি উপহার দিচ্ছে। যাদের অঙ্গপ্রত্যঙ্গ কেটে দেওয়া হচ্ছে তাদের কৃত্রিম অঙ্গ-প্রত্যঙ্গ সরবরাহ করছে। গৃহহীনদের ঘর বানিয়ে দিচ্ছে এবং ঘরে ঘরে গিয়ে অভুক্ত লোকদের খাবার ও শিশুদের দুধ সরবরাহ করছে। এ গোটা সেবা কেবল মাত্র নাম কেনার জন্য করছে না বা পার্থিব কোন পুরস্কারের আশায় করছে না। কেবলমাত্র ঐশী সন্তুষ্টির খাতিরে করছে। কেননা, এটাই ইসলামী শিক্ষা এবং এটাই আহমদীদের প্রতীক।

জামাতে আহমদীয়া একটি ধর্মীয় ও আধ্যাত্মিক জামাত। এর উদ্দেশ্য সারা বিশ্ববাসীকে খোদার প্রতি আহ্বান করা। ইসলামের বাণী পৃথিবীর কোণে কোণে পৌঁছানো এবং মানব সন্তানের মাঝে একটি পবিত্র বিপ্লব সৃষ্টি করা। এ মহান উদ্দেশ্যাবলীর সাথে সাথে জামাত নিজের সীমাবদ্ধ সম্পদ নিয়ে যতটা সম্ভব মানব সন্তানের শিক্ষাগত, সামাজিক ও দৈহিক কল্যাণ ও সফলতার লক্ষ্যে রাতদিন কর্মতৎপর থাকে যেন এটাও ইসলাম ধর্মের একটি অংশ আর খোদার দৃষ্টিতে পছন্দনীয়। পৃথিবীর সেসব দেশ যেখানে শিক্ষা ও স্বাস্থ্যের প্রসঙ্গে ঘাটতি ও কমতি রয়েছে সেসব দেশে সেবা করছে জামাতে আহমদীয়া। এসব ক্ষেত্রে সেবার ঝাড়া বছরের পর বছর উভটীন রেখেছে আর ধর্মসম্প্রদায় নির্বিশেষে প্রত্যেক ক্ষেত্রে মানব সন্তানের প্রতি নিঃস্বার্থ সেবার আবেগের সাথে সত্যিকারের সেবায় নিয়োজিত রয়েছে।

পরিসংখ্যানের দিক থেকে যতটা সম্পর্ক, বর্তমানে বিশ্বের ১৭৭টি (বর্তমানে ২০৮টি

অনুবাদক) রাষ্ট্রে জামাত স্থায়ীভাবে প্রতিষ্ঠিত রয়েছে। ১৩, ২৯১টি মসজিদ নির্মিত হয়েছে। এ আধ্যাত্মিক কল্যাণ বিতরণের সাথে সাথে এখন জামাতের পক্ষ থেকে উন্নতিশীল দেশে ৩৭৩টি স্কুল, ৫৬টি কলেজ চলছে। এগুলো অজ্ঞানতার অন্ধকারে জ্ঞানালোক ছড়াচ্ছে। এভাবে ৩৬টি হাসপাতাল চলছে। এগুলোতে গরীবদের বিনা পয়সার চিকিৎসার সহায়তা দেয়া হচ্ছে। সেবার ক্ষেত্রে আরও একটি মহান সেবা যা জামাতে আহমদীয়া বিশেষভাবে চতুর্থ খিলাফতকাল থেকে দিয়ে যাচ্ছে তা হলো হোমিওপ্যাথির মাধ্যমে সারা বিশ্বে এ কল্যাণজনক মাধ্যমে চিকিৎসার জ্ঞানকে সবার নিকট পৌঁছে দেয়া। এ সফলতার মুকুটটি ছিলো হযরত খলীফাতুল মসীহে রাবে' (রাহেঃ)-এর প্রাপ্য। তিনি দিনরাত একাকার করে এ প্রসঙ্গে বক্তৃতাও দিয়েছেন, পুস্তক প্রণয়ন করেছেন আর কার্যত সারা বিশ্বে এবং বিশেষ করে গরীব দেশগুলোতে হোমিওপ্যাথি ডিসপেনসারির জাল বিছিয়ে দিয়েছেন। এখন পর্যন্ত ৫৫টি দেশে ৬৩২টি হোমিওপ্যাথিক ডাক্তারখানা প্রতিষ্ঠিত হয়েছে। গরীব ও দুর্দশাগ্রস্ত লোকদের জন্য অসাধারণ কার্যকরী প্রভাবের মাধ্যমে চিকিৎসা খুবই ব্যাপকতর ও সস্তায় সরবরাহ করা হয়েছে। প্রত্যেক আহমদী ঘর একটি আরোগ্যের কেন্দ্রে পরিণত হয়েছে। এর কল্যাণ কেবল আহমদীদের মাঝে সীমাবদ্ধ নয় বরং সারা বিশ্বে পৌঁছে যাচ্ছে।

এ মহান কৃতিত্ব ও নিঃস্বার্থ মানব সেবার এ সোনালী দৃষ্টান্ত

لَا تُرِيدُ مِنْكُمْ جَزَاءً وَلَا شُكُورًا

(লা নুরীদু মিনকুম জাযায়ান ওয়া লা শুকুরান)

অর্থাৎ আমরা তোমাদের কাছে কোন পুরস্কার এবং কৃতজ্ঞতা প্রার্থী নই (সূরা আদ্দাহূরঃ ১০)-এর জীবন্ত ব্যাখ্যা। আর এসব লোকদের জন্যে এটা একটি উত্তর যারা জিজ্ঞেস করে, আহমদীয়াত বিশ্বকে কী দিয়েছে?

## এম.টি.এ (ইন্টারন্যাশনাল)

এ প্রশ্নের আরো একটি উত্তর এই, আহমদীয়াত বিশ্বকে বিশ্বব্যাপী প্রচার মাধ্যম এম.টি.এ দিয়েছে। এটাই সারা বিশ্বে প্রকৃত ইসলামের একক আহ্বান। একটি সময় এমন ছিল সারা বিশ্বে জামাতের কাছে নিজস্ব কোন প্রচার ব্যবস্থাপনা ছিলো না। টিভিও ছিলো না। আর রেডিও ছিল না। কোন রেডিওতে কয়েক মিনিট সময়

নেয়া মুস্কিলের বিষয় ছিলো। জামাতের প্রবল আকাঙ্ক্ষা ছিল, কোনভাবে বিশ্বের কোন এক দেশে, ছোট দেশই হোক না কেন বিশ্বের কোন এক কোণে কোন প্রকারের ছোট একটি রেডিও স্টেশন যদি স্থাপন করা যেতো তাহলে এর মাধ্যমে আমরা আহ্মদীয়াত তথা প্রকৃত ইসলামের বাণী সারা বিশ্বে পৌঁছাতে পারতাম। আর বিশ্বকে বলতে পারতাম, যে মাহ্দির আসার কথা ছিলো, যে প্রতিশ্রুত মসীহ-এর আগমনের খবর দেয়া হয়েছিলো তিনি এসে গেছেন। কিন্তু এ উদ্দেশ্য পূরণে কোন পথ দৃষ্টিগোচর হচ্ছিলো না। পরে এমন সময় এসে গেলো যেন আল্লাহতায়াল্লা ‘ছাপ্পর ফেড়ে’ এম.টি.এর এ মহান বিশ্বজনীন উপহার কতকটা আকস্মিকভাবে যুগিয়ে দিলেন, অথচ কেউই এটা আশা করতে পারে নি। এ পুরস্কারের যতই কৃতজ্ঞতা জ্ঞাপন করা হোক না কেন তা কমই হবে। হযরত মসীহে মাওউদ (আঃ) বলেছিলেন :

اسمعوا صوت السماء جاء المسيح جاء المسيح

(ইসমাউ সাওতিস্ সামায়ি জায়াল মসীহ, জায়াল মসীহ)

অর্থাৎ আকাশের আহ্বান শোন। এ ঘোষণা দিচ্ছে, মসীহ এসেছেন! মসীহ-র আবির্ভাব হয়ে গেছে। তাঁর এ ঘোষণা সেসব ঐশী নিদর্শনাবলীর প্রসঙ্গে ছিলো যা একের পর এক প্রকাশিত হয়ে তাঁর (আঃ) সত্যতার ঘোষণা দিয়ে যাচ্ছিলো। কিন্তু দেখ সেই খোদায়ে যুলমিনান (অনেক অনুগ্রহশীল) কিভাবে এ কথা, শব্দে এবং অর্থেও সত্য প্রতিপন্ন করে দেখিয়েছেন। আজ সারা ইসলামী বিশ্বে কেবল এক জামাতে আহ্মদীয়ারই নিজেদের একটি স্থায়ী টেলিভিশন স্টেশন রয়েছে। এটা অহোরাত্র বিশ্বের বিভিন্ন ভাষায় প্রকৃত ইসলাম তথা আহ্মদীয়াতের বাণী প্রচার করছে। আজ পৃথিবীতে কোন এমন একটি স্থানও নেই যেখানে তৌহীদের এ আহ্বানকারীর কথা শুনা যায় না। আজ বিশ্বে অন্য কোন ধর্মের এমন সম্প্রচারকেন্দ্র নেই যার শব্দ সারা বিশ্বে শুনা যায়! কিন্তু খোদার হাতে প্রতিষ্ঠিত জামাতে আহ্মদীয়ার এ টেলিভিশন এমন যে, বিশ্বের সব স্থানে, এটি শুনা যাচ্ছে। আর শহরে শহরে প্রত্যেক জনবসতিতে তৌহীদের আহ্বান শুনানো হচ্ছে এটা রহমান খোদার দয়া। লোকেরা জিজ্ঞেস করে, আহ্মদীয়াত বিশ্বকে কী দিয়েছে? আমি বলি, হে বিশ্ববাসী! হে দ্বীপবাসীগণ! হে জঙ্গলের বাসিন্দারা! উঠো আর নিজেদের টেলিভিশন on করে এ ঐশী আহ্বান শুন। তোমাদের ঘরে পৌঁছেছে আর তোমাদের এই খোদার দিকে

আহ্বান করছে যাঁকে তোমরা ভুলে বসেছিলে। শুন, সেই যুগের মসীহের ডাক শুন। তিনি তোমাদের সরওয়ারে দু’আলম হযরত মুহাম্মদ মুস্তফা সল্লাল্লাহু আলায়হে ওয়া সাল্লামের বাণী দিচ্ছেন। অবশ্য এটা সেই বাণীই যা এক যুগে কাদিয়ান থেকে উচ্চারিত হয়েছিলো আর এখন দেখো :

گر نہیں عرشِ معلیٰ سے یہ ٹکراتی تو پھر

سب جہاں میں گونجتی ہے کیوں صدائے قادیان

“গর নেই আরশে মোয়াল্লা সে

ইয়ে টকরাতি তো ফের,

সব জাঁহামে গুঁজতি হ্যায়

কিঁউ সদায়ে কাদিয়াঁ?”

আরশে মোয়াল্লা থেকে যদি এ সংঘর্ষ না-ই করবে তাহলে পরে সারা বিশ্বে কেন রব তুলেছে কাদিয়ানের ধ্বনি? কী জাঁকজমকের সাথে এর চিত্তাকর্ষক ধ্বনি এবং এর প্রতিধ্বনি সারা বিশ্বে শুনানো হচ্ছে!

আহ্মদীয়াত এম.টি.এ-এর মাধ্যমে ইসলামকে একটি ভাষা দান করেছে। আহ্মদীয়াত বিশ্বকে একটি বাণী দিয়েছে। এটা বিশ্বের প্রান্তে প্রান্তে সুশীল আত্মার লোকগুলোর প্রাণ ইসলামের জন্যে জিতে নিচ্ছে। বিশ্বের প্রান্তে প্রান্তে এ বাণী অন্তরের কপাটগুলোতে খট খটাবে। প্রচন্ড বিরোধী মৌলভী সাহেবানও কপাট বন্ধ করে এ ধ্বনি শুনছেন। কিন্তু আক্ষেপের সাথে বলতে হচ্ছে, হয়তো তাদের আত্মা মরে যাওয়ার কারণে তাদের পাষণ হৃদয়ে সত্যের প্রভাব হয় না বা চাকুরী বা রুজী রোজগারের বিষয়টি প্রতিবন্ধক হয়ে দাঁড়ায়। এটা একটা তাৎপর্য যে, আজ এম.টি.এ ইসলামের পক্ষে একটি শক্তিশালী আহ্বানে পরিণত হয়ে চলেছে। আর ভিতরে ভিতরে একটি মহান বিপ্লব সৃষ্টি হতে যাচ্ছে। এর সুফল অধিক থেকে অধিকতর জ্যোতির্ময় হয়ে চলেছে।

আর্থিক কুরবানী

ধর্মের প্রয়োজনের খাতিরে নিজের ধনসম্পদ খোদার কাজে ব্যয় করা ঈমানের

একটি চিহ্ন। এটা মু'মিনদের একটি বৈশিষ্ট্যপূর্ণ চিহ্ন। এটাও একটি সত্য যে, পরিশ্রমের মাধ্যমে রোজগারকৃত ধনদৌলত ব্যয় করা কোন সহজ কথা নয়। যতক্ষণ আল্লাহুতাআলার মনের সুখ এবং হৃদয়ের প্রশান্তি না দেওয়া এ ক্ষেত্রে পদক্ষেপ কোন সহজ কথা নয়। এ কারণেই আজ বিশ্বে জামাতে আহমদীয়ার মত অন্য মুসলমান সমাজে সুশৃঙ্খল, স্থায়ী ও ধারাবাহিক আর্থিক কুরবানীর এক জাঁকজমকপূর্ণ ব্যপস্থাপনা দৃষ্টিতে আসে না।

জামাতের আহমদীয়ার ওপর আল্লাহুতাআলার এ মহান দয়া। তিনি আহমদীদের আর্থিক কুরবানীর এমন উৎসাহ যোগালেন, তারা পরিপূর্ণ উদ্যোগে প্রাণ খুলে পুণ্যের ক্ষেত্রে অবতীর্ণ হয়ে মু'মিনদের ন্যায় প্রতিযোগিতা করে এমন আশ্চর্যজনক দৃষ্টান্ত উপস্থাপন করে যে, জড় পূজারী লোকেরা এর চিন্তাও করতে পারে না। জড়বাদিতার এ যুগে এমনভাবে কুরবানী করা কেবল আহমদী জগতে পরিদৃষ্ট হয়। এটা হল সেই মহান আবেগ ও অনুসরণযোগ্য দৃষ্টান্ত যা জামাতে আহমদীয়া বিশ্বকে দিয়েছে।

সত্য কথা তো এই, আহমদীরা প্রাথমিক যুগের সাহাবা কেরামের দৃষ্টান্ত জীবিত করে দিয়েছে। হযরত মাওলানা নুরুদ্দীন (রাঃ) নিজের সমস্ত ধনসম্পদ দান করে সিদ্ধিকীয়তের দৃষ্টান্ত জীবিত করেন। ডাঃ খলীফা রশীদুদ্দীন সাহেব (রাঃ) নিজের আর্থিক কুরবানীতে খুবই অগ্রসর হয়েছিলেন। হযরত মসীহে মাওউদ (আঃ) তাঁকে লিখিত দেন, আপনি জামাতের জন্য এতটা আর্থিক কুরবানী করেছেন যে, ভবিষ্যতে আপনার কুরবানীর প্রয়োজন নেই (আল্ ফযল, কাদিয়ান, ১ জানুয়ারি, ১৯২৭)। মিয়াঁ শাদী খান সাহেব সিয়ালকোটি (রাঃ) নিজের ঘরের সব মালপত্র বিক্রি করে সব টাকা চাঁদা হিসাবে উপস্থাপন করে দেন। হযরত মসীহে পাক (আঃ) বলেন, আপনি তো হযরত আবু বকর সিদ্দিক (রাঃ)-এর অনুরূপ দৃষ্টান্ত দেখিয়েছেন। যখন তিনি এটা শুনলেন তখন ঘরে আসলেন এবং ঘরে যে চৌকিগুলো ছিলো সেগুলোও বিক্রি করে দিলেন। আর সব অর্থ হুযুর (আঃ) এর খেদমতে উপস্থাপন করে দিলেন (মকতুবাতে আহমদীয়া, ৫ম খন্ড, নং৫, পৃষ্ঠা ১৪২, ১৪৩, এ ছাড়াও আল্ ফযল, কাদিয়ান, ২৬ জানুয়ারী, ১৯২০)।

বাবু ফকীর আলী সাহেব (রাঃ)-এর নিকট চাঁদা আদায়কারী এলেন। নগদ অর্থ না থাকায় ঘরে যে কিছু আটা মজুদ ছিলো তা-ই চাঁদা হিসাবে দিয়ে দিলেন এবং রাতে ক্ষুধার্ত থেকে গেলেন। নাম ধাম প্রকাশের উদাসীনতার জগতে যে এক কোটি টাকা

চুপিসারে যুগখলীফাকে দিলেন আর আবেদন করলেন, কাউকে এটা বলবেন না। জামাতীয় যে পুণ্য কাজে চান লাগান। ধনী এ আবেগে লক্ষ লক্ষ কোটি কোটি টাকা দিয়ে দেয় যে, এসব খোদারই দান। তাঁর পথে ব্যয় করার সৌভাগ্য পাওয়া গেলো, এটা তো খোদারই অনুগ্রহ। গরিবও এ ক্ষেত্রে পেছনে পড়ে থাকার নয়। শিশুদের প্রয়োজন উপেক্ষা করে অভুক্ত রেখে এক একটি পয়সা যোগার করে দেয়ার উদাহরণ আহমদীয়াতের ইতিহাসে ভরপুর।

পুরুষরা মহিলাদের আগে বেড়ে যাওয়ার চেষ্টায় রত থাকে। আবার মহিলারা পুরুষদের পেছনে ফেলে যাওয়ার অপেক্ষায় থাকে। মসজিদ নির্মাণের সুযোগ আসার অপেক্ষায় যেভাবে পুরুষরা পকেট খালি করে দেয় সেভাবে মহিলাদের নিজেদের প্রিয় গহণাদি এভাবে ছুঁড়ে দিতে দেখা যায় যেমন এসব মূল্যবান অলঙ্কারাদির কানাকড়িও মূল্য নেই। লন্ডনের মসজিদে ফযল হোক বা মসজিদে বায়তুল ফুতুহ, মসজিদ বায়তুল ইসলাম হোক বা মসজিদ বায়তুর রহমান, পৃথিবীর যে কোন মসজিদ নির্মাণের সুযোগ এলেই মহিলাদের পক্ষ থেকে মুশলধারে অলঙ্কারাদির বৃষ্টি বর্ষিত হতে দেখা যায়।

কাদিয়ানের এক দরবেশের প্রেমপূর্ণ কুরবানী এমন, আত্মার ওপর উন্মত্ততা তার অবস্থা সৃষ্টি হয়ে যায়। শামসুদ্দীন সাহেব (রাঃ) দরবেশ দৈহিকভাবে প্রতিবন্ধী ছিলেন। সবসময় একটি ছোট্ট কামরায় পড়ে থাকতেন। ১৯০৫ সনে ওসীয়াতের ব্যবস্থাপনা প্রবর্তিত হলো। ১৯১৯ সনে তিনি এর অন্তর্ভুক্ত হলেন। তিনি পক্ষু ও প্রতিবন্ধী তা সত্ত্বেও তাঁর বেপরওয়া ও আত্মবিগলনের দৃষ্টান্ত দেখুন। তিনি ১৯১৯ সন থেকে ওসীয়াতের চাঁদা দেওয়া আরম্ভ করেন। আর কেবল সারা জীবনই আদায় করেন নি বরং ভবিষ্যত বছরগুলোর জন্যে চাঁদা দিতে থাকেন এবং ১৯৯০ সন পর্যন্ত চাঁদা আদায় করে দেন। অথচ তাঁর মৃত্যু হয়েছিলো ১৯৫০ সনে। তিনি যদিও ইঙ্গিতে কথা বলতেন, হায়! আমি যদি হযরত মসীহে মাওউদ (আঃ)-এর আবির্ভাবের সময় প্রথমিক আহমদীদের অন্তর্ভুক্ত হতে পারতাম, হায়! আমি ১৯৯০ সন পর্যন্ত যদি জীবিত থেকে ইসলামের সেবা করে চলে যেতে পারতাম! কুরবানীর এমন দৃষ্টান্তবিহীন আবেগ এমন এক ব্যক্তির যিনি ছিলেন প্রতিবন্ধী। চলাফেরাও করতে পারতেন না। এপাশ ওপাশ করতে পারতেন না। ত্রোতলিয়ে কথা বলতেন। কিন্তু এ আত্মবিলীনকারী আত্মা কত গতিসম্পন্ন ও কুরবানীর আবেগ ভরপুর ছিলো! (ওহু ফুল জো মুর্বা গায়ে, চৌধুরী ফয়েজ আহমদ গুজরাতি, প্রথম খন্ড, পৃষ্ঠা ৬০-

৬২)।

কাদিয়ানের প্রাথমিক যুগের কথা। দ্বিতীয় খিলাফতের সময় এক গরীব মহিলার কুরবানীর ঘটনা আমরণ সম্মানিত মা অনেকবার শুনিয়েছিলেন। হযরত খলীফাতুল মসীহ সানী (রাঃ) আর্থিক কুরবানীর তাহরীক করেছিলেন। আর এ গরীব ও অবুঝ মহিলা এ কথায় অস্থির হচ্ছিলেন এইভাবে, ধনীরাতো কুরবানী করছেন অথচ আমি এথেকে বঞ্চিত থেকে যাচ্ছি। অতি অস্থিরতার সাথে উঠে ঘরে এলেন। ঘরের জিনিস পত্র বিক্রি করে আগেই চাঁদা দিয়ে দিয়েছিলেন। উঠোনে মুরগী দৃষ্টিতে পড়লো। সেটা নিয়েই হযর (রাঃ)-এর সামনে উপস্থাপন করে দিলেন। আবার দ্রুততার সাথে ঘরে গেলেন। ২/৩ টি ডিম নিয়ে আসলেন। কুরবানীর প্রেরণা এত বেশি ছিলো যে, আরামে বসে থাকোও কষ্টসাধ্য ছিলো। এদিকে হযরত মুসলেহ মাওউদ (রাঃ)-এর খুতবা অব্যাহত ছিলো। সেই মহিলা উঠে এলেন। ঘরের এদিক সৈদিক তাকাতে থাকলেন কিছু পাওয়া গেলে তা-ও উপস্থাপন করে দিবেন। স্বামী একখানা ভাঙ্গা টোকিতে শুয়েছিলেন। তিনি বল্লেন, তুমি কী খুঁজছো? ঘরে তো কিছুই ছিলো না। খোদার পথে কুরবানী করার জন্যে কসম খেয়ে বসেছিলেন। খুব রাগ করে বল্লেন, চুপ করে বসে থাকো, আমার ক্ষমতা থাকলে আমি তোমাকে বিক্রি করে ও চাঁদা দিয়ে দিতাম। এসবই সেই প্রকৃত আবেগ। জামাতে আহমদীয়ার প্রত্যেক নর ও নারীর বৈশিষ্ট্য এটাই। আর এসব সেই কুরবানীর আবেগ। এ দৃষ্টান্তই জামাতে আহমদীয়া বিশ্বকে দিয়েছে!

## সন্তানসন্ততির কুরবানী

সন্তানসন্ততির আল্লাহর পথে কুরবানী করা সহজ কথা নয়। এর মাহাত্ম্য ও গুরুত্ব সে-ই জানতে পারে, যে এ পথ অতিক্রম করেছে। একজন মায়ের জন্যে এর চেয়ে অধিক কুরবানী চিন্তা করা যেতে পারে না। সে নিজের কলিজার টুকরো মৃত্যুর মুখে নির্বিল্পে উপস্থাপন করে দেয়। আহমদীয়াতের ইতিহাস সাক্ষ্য। আহমদী মায়েরা এক্ষেত্রে সেই দৃষ্টান্ত বিশ্ব কে দিয়েছে। বিশ্বের ইতিহাস এ সম্বন্ধে অবহিত নয়। এমন মা-ও রয়েছেন নিজেদের এক, দুই, তিন নয় বরং চার চারটি পুত্রই খোদার পথে উপস্থাপন করে দিয়েছেন। কাঁদতে কাঁদতে নয়, হাসতে হাসতে, উৎফুল্ল চিত্তে আর আল্লাহর দরবারে সিজদা ও কৃতজ্ঞতা করতে করতে। গুজরাঁওয়ালার এ বীরাজনা

মাকে ইতিহাস কি করে ভুলাতে পারে! তিনি আশ্চর্য মর্যাদার সাথে নিজ সন্তানদের শাহাদতের জন্যে উপস্থাপন করে দিয়েছেন। সে দিন এ অনুমানের ভিত্তিতে যে, আজ শাহাদতের সেই সময় উপস্থিত। এ ব্যঙ্গ-হৃদয়সম্পন্ন মা নির্ভয়ে কান্না-কাটি না করে নিজের কলিজার টুকরোকে গোসল করিয়ে ধুয়ে মুছে পরিষ্কার-পরিচ্ছন্ন কাপড়-চোপড় পরাতে ব্যস্ত ছিলেন। শাহাদতের সময় যদি এসে যায় তাহলে এ সুন্দর নিষ্পাপ শিশু নিজ প্রভুর সন্নিধানে যেন উপস্থিত হতে এক মু'মিনরূপ সাজে সজ্জিত হচ্ছে।

দ্বিতীয় খিলাফতের সময় একবার মাতৃভূমির প্রতিরক্ষাকল্পে যুবকদের সেনাবাহিনীতে যোগ দেওয়ার তাহরীক করেন। অবস্থা এ রকম ছিলো এসব দিনে সেনাবাহিনীতে যোগ দেওয়া মৃত্যুকে আলিঙ্গন করার শামিল ছিল। এক স্থানে যখন এ সংবাদ পৌঁছানো হলো তখন তরিৎ গতিতে নীরবতা ছেয়ে গেলো। কোন যুবক নাম লেখানোর জন্যে এগিয়ে এলেন না। সেখানে এক বিধবা মহিলা বসেছিলেন। এ বেচারীর একটি মাত্র ছেলে। ভবিষ্যতে সন্তান জন্ম দেয়ারও কোন সুযোগ ছিলো না। যুগখলীফার তাহরীক শুনে খোদার বাঁদী আবেগাপুত হলেন। খোদা ও রসূল (সাঃ)-এর নামে, যুগ খলীফার পক্ষ থেকে কুরবানীর তাহরীক। এরা সবাই নীরব! এ বাঘিনী নিজ পুত্রকে সম্বোধন করে বল্লেন,

‘হে আমার ছেলে অমুক! তুমি বলছো না যে, তুমি কি শুন নি যুগখলীফা আহমদী যুবকদের ডাকলেন? সৌভাগ্যবান পুত্র অমনি নিজের নাম লিখিয়ে দিলেন। কেউ আমাদের দেখিয়ে দিক। অন্য বিশ্বের কোথায় এমন মা রয়েছেন, যিনি ধর্মের সেবার জন্যে নিজের কলিজার টুকরো এভাবে উপস্থাপন করেন। এ বৈশিষ্ট্য কেবল আহমদী মায়েরদের রয়েছে। এরা ধর্মের সেবার খাতিরে নিজের সব কিছু প্রভুর খেদমতে উপস্থাপন করার প্রকৃত অঙ্গীকার করেন। আর সময় আসলে এ অঙ্গীকার পুরো করে দেখান। এ বিধবা মহিলা যে তেজদীপ্ত আবেগে নিজের একমাত্র পুত্রকে কুরবানী করার জন্যে পেশ করলেন, হযরত মুসলেহ মাওউদ (রাঃ) যখন এ ঘটনা শুনলেন তখন দোয়া করলেন :

“হে আমার প্রভু-প্রতিপালক! এ বিধবা নারী নিজের একমাত্র পুত্রকে তোমার ধর্মের সেবার জন্যে বা মুসলমানদের দেশ রক্ষার জন্যে পেশ করেছেন। হে আমার প্রভু-প্রতিপালক! এ বিধবা মহিলার চেয়ে অধিক কুরবানী করা আমার অবশ্য কর্তব্য। আমিও তোমার কাছে তোমার প্রতাপের দোহাই দিয়ে এ দোয়া করছি, মানবীয়

কুরবানীর প্রয়োজন হলে, হে আমার প্রভু-প্রতিপালক! তার পুত্র নয় আমার পুত্র যেন মারা যায়' (তারিখে লাজনা ইমাইল্লাহ, ২য় খন্ড, পৃষ্ঠা ১১৪, প্রথম মুদ্রণ ১৯৭২)।

## কুরবানীর ব্যাপক ক্ষেত্র

জামাতে আহমদীয়া সারা বিশ্বে একটি মহান আধ্যাত্মিক বিপ্লবের নিশানবাহী আন্দোলন। ইতিহাস সাক্ষী। মানবের সংশোধনের খাতিরে যত আন্দোলন হয়েছে একে সবসময় কুরবানী করতে ও ধৈর্যের পরীক্ষার মাঝ দিয়ে অতিক্রম করতে হয়েছে। আমাদের প্রভু ও নেতা হযরত মুহাম্মদ মুস্তফা সাল্লাল্লাহু আলায়হে ওয়া সাল্লাম এবং তাঁর (সাঃ) নিবেদিত প্রাণ সাহাবাগণ (রাঃ) এক্ষেত্রে যে আদর্শ দৃষ্টান্ত স্থাপন করে গেছেন এ দৃষ্টান্ত আল্লাহুতাআলার অনুগ্রহে আহমদীয়া জামাতে এ যুগে পুনরায় জীবিত করে দেখিয়েছে।

কুরবানীর ক্ষেত্রে প্রাণ উৎসর্গ সবচেয়ে মহান কুরবানী। জীবনরূপ সম্পদ প্রতিটি মানুষের কেবল একবারই লাভ হয়ে থাকে। আর এটা সবচেয়ে শ্রিয় জিনিস। এর কুরবানী কুরবানীর সেরা। জামাতে আহমদীয়ার এ বৈশিষ্ট্য লাভ হয়েছে, এক্ষেত্রেও এটা সাহাবায়ে কেরামের আদর্শ জীবিত করে দেখিয়েছে আর বাস্তবেও প্রমাণ করে দিয়েছে যে, আখারীন বা অন্য মু'মিনদের যুগে সাহাবাদের মসীল ও সদৃশ এ জামাতই।

প্রাণোৎসর্গের কথা এলেই মাখায় প্রথমে হযরত মিয়া আবদুর রহমান সাহেব (রাঃ)-এর নাম আসে। তাঁর আহমদীয়াত গ্রহণ করার কারণে আফগানিস্তানে তাঁকে শহীদ করে দেওয়া হয়। মরহুমের গলায় কাপড়ের ফাঁস লাগিয়ে খুবই নিদারুণভাবে তাঁকে গলা টিপে মেরে ফেলা হয়। তিনি আহমদীয়াতের প্রথম শহীদ হওয়ার মর্যাদা লাভ করেন। তাঁর পর হযরত সাহেবযাদা আব্দুল লতীফ সাহেব (রাঃ) অসাধারণভাবে স্বৈর্য ও মর্যাদার সাথে সাহাদতের পেয়ালা পান করেন। হযরত মসীহে মাওউদ (আঃ) এ উভয় বুয়ুর্গের বিস্তারিত বিবরণ তাঁর পবিত্র হাতে লিখেছেন আর বলেছেন,

'হে আব্দুল লতীফ! তোমার প্রতি অশেষ অনুগ্রহ। তুমি আমার জীবদ্দশায়ই তোমার সত্যবাদিতার দৃষ্টান্ত দেখিয়েছো' (রুহানী খাযায়েন, লন্ডনে মুদ্রিত, ১৯৮৪, খন্ড ২০, তায়কিরাতুশ শাহাদাতায়েন, পৃষ্ঠা ৬০)।

হযরত সাহেবযাদা সৈয়দ আব্দুল লতীফ সাহেব শহীদ (রাঃ) জ্ঞানের শ্রেষ্ঠত্ব ও খোদাতীতির কারণে কাবুলের ভূমির নেতৃস্থানীয় ছিলেন। হাজার হাজার লোক তার অনুসারী ছিল। তিনি রাজ্যের বাহু ছিলেন। কাবুলের আলেমদের মাঝে দিবাকরের মত তিনি বিরাজ করতেন। তিনি যখন হযরত মসীহ মাওউদ (আঃ)-এর দাবীর সত্যতা বুঝে শুনে গ্রহণ করলেন এবং আফগানিস্তানে ফেরত গেলেন তখন তাঁকে এ অপরাধে গ্রেফতার করা হলো। ৪ মাসের সশ্রম কারাদন্ডের কষ্ট ভোগ করেন। জেলে ১মন ২৪ সের ওজনের শিকলে তাঁকে বাঁধা হলো। পায়ে ৮ সের ওজনের বেড়ি পরানো হলো। তিনি লক্ষ লক্ষ টাকার জায়গীরের মালিক ছিলেন এবং আরাম আয়েশে লালিতপালিত হয়েছিলেন। এসব দুঃখকষ্ট খুবই স্বৈর্যের সাথে সহ্য করেন। আমীর তাঁকে বারবার আহমদীয়াত পরিত্যাগ করার জন্য প্রলুব্ধ করেন। সম্মানের সাথে মুক্তি ও পুরস্কার এবং মর্যাদা দানের অঙ্গীকার করেন। কিন্তু কোন লালসা ও কোন অঙ্গীকার তাঁর স্বৈর্যকে সামান্যও টলাতে পারে নি। তিনি ছিলেন ধৈর্যের পাহাড়। প্রত্যেক বারেই তাঁর জবাব এটাই ছিলো, "আমি ঈমানের ওপর পৃথিবীকে প্রাধান্য দিই আমার কাছে এমনটি আশা করো না। যাঁকে আমি নিজে সনাক্ত করেছি এবং সব রকমের প্রশান্তি লাভ করেছি আর তাঁকে মৃত্যু ভয়ে অস্বীকার করবো এটা কি করে হতে পারে? এ অস্বীকার আমার দিয়ে হবে না। আমি দেখতে পাচ্ছি, আমি সত্যের ওপর প্রতিষ্ঠিত। কয়েক দিনের জীবনের জন্যে আমাকে দিয়ে এই বেঈমানী হবে না। আমি প্রমাণিত সত্যকে ছেড়ে দিই কীভাবে? আমি জীবন দিতে প্রস্তুত। আর সিদ্ধান্ত করে নিয়েছি, সত্য আমার সাথী হবে"। (রুহানী খাযায়েন, লন্ডনে মুদ্রিত, ১৯৮৪, তায়কেরাতুশ শাহাদাতায়েন, পৃষ্ঠা ৫২)। পরিশেষে সে দিন এসে গেলো।

আজ থেকে ঠিক একশ' বছর পূর্বে অর্থাৎ ১৪ জুলাই, ১৯০৩ যখন এ বুয়ুর্গ ও খোদার শ্রেষ্ঠ পুরুষের ওপর কুফরী ফতওয়া লাগিয়ে দেওয়া হলো। নাকে ছিদ্র করে রশি ঢুকিয়ে দেওয়া হলো। এভাবে একটি পশুর ন্যায় টেনে বধ্যভূমিতে নিয়ে যাওয়া হলো। কতো ব্যথাপূর্ণ দৃশ্য ছিল! জালেমরা এ নিষ্পাপ মানুষটির ওপর সব দিক থেকে গালিগালাজ করতে লাগলো এবং অভিশাপ বর্ষণ করতে লাগলো। ফিরিশ্তারা তখন আকাশ থেকে এ বুয়ুর্গ মানুষটির স্বৈর্য ও মাহাত্ম্যের ওপর স্বাগতম স্বাগতম বলতে ছিলেন। তিনি এমনই সুদৃঢ় পাহাড় সদৃশ ছিলেন কোন লালসা বা ভয় তাঁকে স্থানচ্যুত করতে পারে নি। জালেমরা এ নিষ্পাপ মানুষটিকে

কোমর পর্যন্ত মাটিতে গুঁড়ে দিলো। পরে সব দিক থেকে পাথর বর্ষিত হতে লাগলো। দেখতে দেখতে এ পবিত্র পুরুষ পাথরের স্তরের নীচে চাপা পড়ে অদৃশ্য হয়ে গেলেন। শহীদ মরহুম শাহাদতের পেয়ালা পান করে অনন্ত জীবন লাভ করলেন। কিভাবে ঈমান ও সত্যের খাতিরে প্রাণ বিসর্জন দিতে হয় নিজের প্রাণ দিয়ে সাহস ও স্বৈর্যের এমন দৃষ্টান্ত স্থাপন করলেন।

শাহাদতের যে প্রদীপ শহীদ মরহুম জ্বালিয়ে গেলেন তা আহমদীয়াতের ইতিহাসের প্রত্যেক পর্যায়ে আলোকিত করছে। আজ পর্যন্ত ২১০ এর বেশি এমন পবিত্র সত্তা এ পথে চলে শাহাদতের পেয়ালা পান করেছেন। আকাশে আহমদীয়াতের তারকারাজিসদৃশ্য এ সৌভাগ্যবান জীবিত লোক রয়েছে যারা আহমদীয়াতের সত্যতার ওপর নিজেদের পবিত্র রক্ত দিয়ে মোহরাঙ্কিত করে গেছেন এবং অনন্ত জীবন লাভের উত্তরাধিকারী বলে আখ্যায়িত হয়েছেন।

শাহাদতের মর্যাদাপ্রাপ্তদের সাথে সাথে আসীরানে রাহে মাওলা (আল্লাহর পথে বন্দীগণ) ও এ পবিত্র পথের যাত্রী। এ পথে বন্দীদের স্বৈর্য ও একটি কারামাত (অলৌকিক কর্ম)। একটি মহান নিদর্শন আর আহমদীয়াতের সত্যতার প্রমাণ। এসব নিষ্পাপ লোকদের খুবই নির্মমভাবে বন্দী বানানো হয়। কিন্তু খোদার এ বান্দারা হাত কড়াকে চুম্বন করেন আর ভাবেন, আল্লাহর পথে তাদের কষ্ট সহ্য করার সৌভাগ্যই লাভ হয়েছে। আল্লাহর পথে ধৈর্য ও স্বৈর্য প্রদর্শনকারী এবং যুলুম নির্যাতনে হাসি মুখের অধিকারী বুদ্ধিমান লোক আহমদীয়াত ছাড়া কোথাও পরিদৃষ্ট হয় না।

## ইসলামের তবলীগের উদ্দীপনা ও কুরবানী

হযরত মসীহ মাওউদ আলায়হেস সালামের একজন সাহাবী মৌলভী ফতেহ দীন ধরমকোট সাহেব (রাঃ) বর্ণনা করেন, আমি হযরত মসীহে মাওউদ (আঃ)-এর কাছে অধিকাংশ সময় উপস্থিত থাকতাম। কয়েকবার রাতেও হযর (আঃ) এর কাছে অবস্থান করতাম। একবার আমি দেখলাম, মাঝরাত আসার কাছাকাছি সময়ে হযরত সাহেব অনেক বিচলিত ও উদ্ভিন্ন হলেন। এক কোণ থেকে অন্য কোণে ছটফট করে পায়চারি করছেন। মায়েরা যেভাবে অস্থির ভাবে ছটফট করে বা কোন রোগী প্রচণ্ড ব্যথায় ছটফট করতে থাকে। আমি এ অবস্থা দেখে খুবই ভয় পেয়ে গেলাম। অনেক

চিন্তিত হলাম। আমার মনে এক ভীতিজনক অবস্থার সৃষ্টি হলো। আমি অস্থিরতার অবস্থায়ই শুয়ে থাকলাম।

মসীহে মাওউদ (আঃ)-এর সেই অবস্থা দূর হতে লাগলো। সকালে হযর (আঃ)-এর কাছে এসে এর উল্লেখ করলাম। রাতে আমি এ ধরণের দৃশ্য দেখেছি। হযরের কি কোন কষ্ট হচ্ছিলো বা পেটে ব্যথা বা ঐ ধরণের কোন কষ্ট ছিলো?

হযরত মসীহে মাওউদ (আঃ) বলেন :

‘মিয়ার্ ফতেহু দীন, তুমি কি সেসময় জেগে ছিলে? আসল কথা এই, আমাদের ইসলামের অভিযানের কথা যখন স্মরণে এলো আর ইসলামের ওপর আসন্ন বিপদ-আপদের কথা মনে হল তখন আমাদের মন বেশি অস্থির হয়ে গেল। এটা ইসলামের জন্যেই দরদ। এটা আমাদের বিচলিত করে ফেলে’ (সীরাতুল মাহ্দী, কাদিয়ানে মুদ্রিত ১৯৩৯, ২য় খন্ড, পৃষ্ঠা ২৯)। সেই বরকতপূর্ণ সত্তার এ অবস্থা ছিলো। তিনি জীবনের প্রতিটি মুহূর্ত এভাবে উৎসর্গ করে দিয়েছিলেন। দিন রাত ইসলামের সেবায় কাটিয়ে দেওয়া সত্ত্বেও রাতে এ রকম অস্থির অবস্থায় কাটাতেন। তিনি বলছেন,

‘আমাদের ক্ষমতা হলে আমরা ভিক্ষুকের মত ঘরে ঘরে গিয়ে খোদাতাআলার প্রকৃত ধর্মের প্রচার করি আর পৃথিবী ছেয়ে আছে এমন ধ্বংসকারী শিরুক ও কুফরী থেকে লোকদের রক্ষা করি। খোদা যদি আমাদের ইংরেজী ভাষা শিখিয়ে দেন তাহলে আমরা স্বয়ং ঘুরে ঘুরে এবং সফর করে তবলীগ করি আর এর তবলীগে জীবন পাত করি। অবশেষে এ পথে মারাই যাই না কেন’ (মলফুযাত, লন্ডনে মুদ্রিত, ১৯৮৪, ৩য় খন্ড, ২৯১-২৯২ পৃষ্ঠা)।

তাঁর (আঃ) গোটা জীবন এ আবেগ অনুযায়ীই কেটে গেছে। তিনি ইসলামের সেবার প্রত্যেক পথে পদচারণা করে ইসলামের তবলীগের প্রতিটি পস্থা অবলম্বন করেছেন এবং সবচে’ অধিক এ আবেগ উদ্দীপনাই নিজ জামাতেও এমনভাবে সৃষ্টি করে গেছেন যেন ধর্মের সেবার উদ্দীপনাই জামাতের পরিচিতিতে পরিণত হয়ে গেছে। আহরারী চিন্তাবিদ চৌধুরী আফযল হক সাহেব জামাতে আহমদীয়ার ইসলাম প্রচারের উদ্দীপনা ও তবলীগের চেষ্টাচেষ্টার ব্যাপারে লিখেছেন :

‘মুসলমানদের অন্যান্য ফিরকার মাঝে তো কোন জামাত তবলীগের উদ্দেশ্যে সৃষ্টি হতে পারেনি অবশ্য মুসলমানদের অসফলতায় ব্যথিত হয়ে একটি হৃদয় দূরে দাঁড়িয়েছে, ছোট একটি জামাত নিজের চারিদিকে একত্র করে ইসলামের প্রচার ও

প্রসারের জন্যে এগিয়ে আসছে..... নিজেদের জামাতে তারা প্রচারের উদ্দীপনা সৃষ্টি করে চলেছে। এটা কেবল মুসলমানদের বিভিন্ন ফিরকার জন্যে অনুকরণীয় নয় বরং বিশ্বের সকল প্রচারক দলের জন্যে দৃষ্টান্তস্বরূপ।’ (ফিতনা ইরতিদাদ আওর পলিটিকাল ক্বলাবাজিয়া, প্রণেতা চৌধুরী আফযল হক, মুদ্রিত কো অপরেটিভ স্টিম প্রেসে মুদ্রিত ওয়াতন বিল্ডিং, লাহোর, পৃষ্ঠা ৪৬)।

এ প্রচারণার উদ্দীপনা সম্বন্ধে অন্যরাও অবহিত। আসলে এটা জামাত আহমদীয়ার বিরল বৈশিষ্ট্য। জামাত আহমদীয়া যে ব্যাপকতা, জাঁকজমক, স্থায়িত্ব ও সফলতার সাথে দাওয়াতে ইলাল্লাহর অভিযান সারা বিশ্বে চালু রেখেছে এর দৃষ্টান্ত কোথাও পরিদৃষ্ট হয় না। ইসলামের তবলীগের আবেগ এ জামাতের স্বভাবে নিহিত। আর প্রতিটি অন্তরে এর উদ্দীপনা ও ভালবাসা অনুভব করা যায়। এটা সেই মহান ঈমানের সম্পদ। এটাই আহমদীয়াত বিশ্বকে দিয়েছে। ধর্মের সেবা ও ইসলামের প্রচারের বিরল আবেগ-এর দৃষ্টান্ত আহমদীয়াত বিশ্বকে দিয়েছে।

সারা বিশ্বে ইসলামের তবলীগ করা কোন পুতুল খেলা নয়। এ পথে প্রাণ, ধন, সময়, সম্মান ও আরামআয়েশ সব কিছুই কুরবানী দিতে হয়। আর জামাত আহমদীয়ার এটা সৌভাগ্য। একে খোদাতাআলা প্রত্যেক যুগে এমন নিষ্ঠাবানদের দান করেছেন, যারা এ কল্যাণমন্ডিত পথে চলার এমন সংকল্প নিয়ে ঐকান্তিকতার সাথে এগিয়ে এসেছে আর নিজেদের জীবন যুগখলীফার সমীপে উপস্থাপন করে দিয়েছে। জীবন উৎসর্গীকৃতদের এ সৌভাগ্যবান দল তাদের নিঃস্বার্থ কুরবানী ও দিন রাতের পরিশ্রমে কুফরীর অন্ধকারাচ্ছন্ন এলাকায় ইসলামের প্রদীপ জ্বালিয়েছে। ইসলামের সাহসী বীরেরা, প্রচণ্ড রোদে, ক্ষুধার্ত ও পিপাসিত অবস্থায় পায়ে হেঁটে গ্রামে গ্রামে গিয়ে এক-অধিতীয় খোদার বাণী পৌঁছিয়েছে। আফ্রিকার বনে জঙ্গলে গাছের পাতা খেয়ে দিন কাটিয়েছে। শত্রুদের হাতে মার খেয়েছে। পাথর ও খঞ্জরের আঘাতে জর্জরিত হয়েছে। তাদের বিভিন্ন প্রকার অত্যাচারের লক্ষ্যস্থল বানানো হয়েছে। কিন্তু সর্বাবস্থায় তবলীগের পতাকা সমুন্নত রেখেছে। বরফ শীতল জেলে পুরে তাদের সামনে শূকরের মাংস রাখা হয়েছে। মৃত্যু থেকে বাঁচার জন্যে কয়েক টুকরো রুটি ও পানি পান করে দিন কাটিয়ে দিয়েছেন। এমন সব বীভৎস ঘটনা রয়েছে যা শুনলে গায়ে কাঁটা দিয়ে ওঠে। এসব কিছু ঘটেছে। কিন্তু আহমদীয়াতের এসব বীর সন্তানেরা সর্বাবস্থায় ইসলামের বানী পৌঁছাতে রয়েছেন। বিশ্বস্ততা ও প্রেমের এসব কাহিনী শেষ হবার নয়। এদের মাঝে কেউ কেউ এমনও ছিলেন যারা

বিয়ের পরে যুবতী স্ত্রীকে একাকী রেখে অন্য দেশে চলে গেছেন। অনেক দিন পরে ফিরে এসেছেন তো যুবতী স্ত্রীর ওপর বার্ষিক্য ছেয়ে গেছে। কেউ কেউ এমনও ছিলেন যারা ছোট ছোট সন্তান রেখে গেছেন অনেক বছর পর ফিরে এসে নিজ সন্তানকেই আর চিনতে পারেন নি। এসব মুজাহিদগণের মাঝে এমন বিশ্বস্ত ব্যক্তিও ছিলেন যারা বৃদ্ধ পিতামাতাকে ছেড়ে তবলীগের জন্যে রওয়ানা দিয়েছেন এবং ভিন্ন দেশে গিয়ে শুনেছেন পিতামাতা এ দুনিয়া ছেড়ে চলে গিয়েছেন।

এমন কোন কোন সাহসী মুজাহিদ ছিলেন যারা নিজের সব কিছু ছেড়ে দিয়ে ইসলামের কলেমার নাম সমুন্নত করার জন্যে চলে গেছেন। আর কখনও দেশে ফিরে আসেন নি। সেই জেহাদে কবীর করতে নিজের প্রাণের উপহার উপস্থাপন করেছেন। আজ পর্যন্ত সেই ভূমিই তাদের শেষ বিশ্রামস্থল হয়ে রয়েছে। কুরবানীর এসব কাহিনী, কুরবানীর এসব সত্য দৃষ্টান্ত আর প্রেম ও বিশ্বস্ততার এ জীবিত দৃষ্টান্ত এ যুগে কেবল আহমদীয়াতের মাঝেই পরিদৃষ্ট হয়।

আত্মত্যাগ ও নির্ভীকতার এসব কাহিনী এ পর্যন্তই সীমাবদ্ধ নয় বরং এমন সব মুজাহিদও আল্লাহুতাআলা আহমদীয়াতকে দান করেছেন যারা অবসর গ্রহণের পর শেষ নিঃশ্বাস পর্যন্ত জামাতের সেবায় নিয়োজিত থাকেন। এমন ডাক্তার রয়েছেন যাঁরা বছরের পর বছর চিকিৎসা ক্ষেত্রে মানবতার সেবা করেছেন। এমন শিক্ষক রয়েছেন যারা জ্ঞানের আলোকে বিশ্ব আলোকিত করেছেন। এখন আল্লাহুতাআলার অনুগ্রহে ওয়াকফীনে নওদের এক মহান বাহিনী কার্যক্ষেত্রে যাওয়ার জন্যে প্রস্তুত হচ্ছে। এরা ইসলামের সেই ছোট ছোট প্রেমিক। তাদের পিতামাতা তাদের জন্মের পূর্বে তাদের উৎসর্গ করেছেন আর ধর্মের সেবার উদ্দেশ্যে জামাতের কাছে সোপর্দ করেছেন।

যুগখলীফা ১৯৮৭ সনে ৫,০০০ ওয়াকফীনে নও-এর আকাঙ্ক্ষা প্রকাশ করেছিলেন। আহমদী পিতামাতা উৎফুল্ল চিত্তে এ তাহরীকে ‘লাব্বায়েক’ বলেছেন। আজ (অর্থাৎ জুলাই ২০০৩-এ) সেই মুজাহিদীনের সংখ্যা আল্লাহুতাআলার আশিসক্রমে ২৬, ৩২১ পর্যন্ত পৌঁছে গেছে। খোদার পথে জীবন উৎসর্গ করার এ ক্রমাগত ব্যবস্থাপনাও আরেকটি মহান দান। এটাও আহমদীয়াত বিশ্বকে দিয়েছে। কেউ বলুন তো, এভাবে নিজের সব কিছু দিয়ে জান্নাত ক্রয় বিশ্বের আর কোথায় আছে?

## দোয়ার গ্রহণীয়তার তত্ত্বজ্ঞান ও অভিজ্ঞতা

দোয়ার কবুলিত বা গ্রহণীয়তা আল্লাহুতাআলার সত্তার একটি প্রমান। আর মু'মিনের ঈমান বৃদ্ধির মাধ্যমও বটে। আহ্মদীয়াত বিশ্ববাসীকে এ সুসমাচার শুনিয়েছে, আমাদের খোদা এক জীবন্ত খোদা। তিনি বান্দাদের দোয়া শুনে থাকেন আর এর উত্তরও দিয়ে থাকেন। আবার দোয়ার গ্রহণীয়তার সুমিষ্ট ফল দান করে থাকেন। যে চ্যালেঞ্জ, প্রতাপ ও দৃঢ়বিশ্বাসের সাথে আহ্মদীয়াত বিশ্বের সামনে এটা উপস্থাপন করেছে এবং সংখ্যা ও ধারাবাহিকতার বিশ্বে আহ্মদীয়াতের দোয়ার কবুলিয়তের জীবন্ত নিদর্শনসমূহ প্রকাশিত হয়েছে আর হয়ে চলেছে এর দৃষ্টান্ত সারা বিশ্বে আর কোথাও পাওয়া যায় না। আহ্মদীয়াতই সারা বিশ্বে দোয়ার কবুলিয়তের প্রকৃত তত্ত্বজ্ঞান দান করেছে এবং এর তাজা তাজা বিকাশের দৃষ্টান্ত এত অধিক সংখ্যায় দেখিয়েছে যে, এর গণনা সাধ্যাতীত। সত্য কথা তো এই, আজ বিশ্বে কোন আহ্মদী পরিবার এমন নেই যা প্রত্যক্ষ বা পরোক্ষভাবে দোয়ার কবুলিয়তের সাক্ষী নয় বা অভিজ্ঞতা লাভ করে নি। দোয়ার ওপর প্রকৃত বিশ্বাস ও দোয়ার কবুলিয়তের ব্যক্তিগত অভিজ্ঞতা তো প্রত্যেক আহ্মদীর জীবনের অংশে পরিণত হয়ে গেছে। আল্লাহুতাআলার আশিসে প্রত্যেক আহ্মদীর জীবনের অংশে পরিণত হয়ে গেছে। এটি আল্লাহুতাআলার আশিসে প্রত্যেক আহ্মদী এ পথে পরিচালিত। আহ্মদীয়াতের জগতে যে ভালবাসা ও উদ্দীপনা আর ধারাবাহিকতার সাথে প্রত্যেক ঘরে দোয়া এবং এর কবুলিয়ত ও উপকারিতার আলোচনা চলে অবশিষ্ট সারা বিশ্বে সম্মিলিত ভাবেও এতটা আলোচনা চলে না। কেবল পুরুষ ও নারীই নয় ছোটরাও এর স্বাদের সাথে পরিচিত। নিঃসন্দেহে দোয়ার এ অবস্থা, এর তত্ত্বজ্ঞান ও এতটা অভিজ্ঞতা বিশ্বের অন্য কোন জামাতের এ রঙ্গে সৌভাগ্য ঘটে নি।

দোয়া কী? আর এর প্রভাবসমূহ ও কল্যাণ কী? হযরত মসীহ মাওউদ (আঃ)-এর তত্ত্ব-জ্ঞানপূর্ণ কথায় শুনুন। তিনি (আঃ) বলেন :

‘এটা বিগলিত করে, এটা কোমল করে দেয় এমন আশুন। এটা করুণা আকর্ষণকারী এক চৌম্বকীয় আকর্ষণ। এটা মৃত্যু বিশেষ। পরিশেষে এক জীবন দান করে। এটা প্রবল এক বন্যা। পরিশেষে নৌকায় পরিণত হয়। প্রত্যেক বিশৃঙ্খল বিষয় এর মাধ্যমে সুশৃঙ্খল হয়। প্রত্যেক বিষ পরিশেষে প্রতিষেধকে পরিণত হয়ে যায়---

মোটকথা পরশ পাথর বানিয়ে দেয়। এটা এক প্রকার পানি যা অভ্যন্তরীণ আবর্জনাকে ধুয়ে ফেলে। এ দোয়ার সাথে আত্মা বিগলিত হয়ে পানির মত বহমান হয়ে আল্লাহুর আশ্রয় অবনত হয়’ (রুহানী খাযায়েন, লন্ডনে মুদ্রিত, ১৯৮৪, ২০ খন্ড, লেকচার সিয়ালকোট, পৃষ্ঠা ২০-২১)। আবার তিনি (আঃ) বলেন, ‘দোয়ার প্রভাব আশুন ও পানির চেয়ে বেশি। বরং ঔষধের উপকরণের মাঝে দোয়ার মত কোন কিছু এমন মহান প্রভাব রাখে না’ (রুহানী খাযায়েন, লন্ডনে মুদ্রিত, ১৯৮৪, খন্ড, বারাকাতুদ্দোয়া, পৃষ্ঠা ১১)।

দোয়ার কবুলিয়তের পবিত্র জ্যোতির্বিকাশ কী কী ভাবে হয়েছে, এটা এমন এক বিশাল সমুদ্র এর সীমা পরিসীমা কখনও করা যেতে পারে না। আর এর বর্ণনাও কখনও পরিপূর্ণ হতে পারে না। এটা একটা সদা প্রবহমান ধারা। এ ব্যাপক থেকে ব্যাপকতর হচ্ছে। জামাত আহ্মদীয়ার ইতিহাস দোয়ার কবুলিয়তের ঘটনাবলিতে এমনভাবে ভরপুর যেভাবে আকাশ তারকারাজিতে পরিপূর্ণ। কোন্ কোন্ ঘটনাই বা বর্ণনা করি! কয়েকটি দৃষ্টান্তমূলক ঘটনার কথা সংক্ষেপে নিবেদন করছি। এগুলো থেকে অনুমান করা যেতে পারে আল্লাহুতাআলা আহ্মদী জামাতকে কিভাবে দোয়ার কবুলিয়তের জীবন্ত ও জীবন প্রদায়িনী বৈশিষ্ট্যপূর্ণ মু'জিয়া ও অলৌকিক ঘটনাবলী দিয়ে ভূষিত করেছেন :

হযরত মসীহে মাওউদ (আঃ)-এর জীবনে মুগী আতা মুহাম্মদ পাটওয়ারী সাহেবের ঘটনা খুবই মশহুর ও বিখ্যাত। তার তিন স্ত্রী ছিল; কিন্তু সন্তানসন্ততি থেকে বঞ্চিত ছিলেন। তিনি বললেন, মির্য়া সাহেবের দোয়ায় আমার তিন স্ত্রীর মধ্যে যার গর্ভে আমি চাই, যদি সন্তান লাভ হয় তাহলে আমি আহ্মদী হয়ে যাবো। মসীহ পাক (আঃ) দোয়া করলেন। এর কল্যাণে তার আকাঙ্ক্ষানুযায়ী সন্তান লাভ হলো এবং সাথে সাথে আহ্মদীয়াতরূপ সম্পদও লাভ হলো (সীরাতুল মাহ্দী, কাদিয়ানে মুদ্রিত, ১৯৩৫, প্রথম খন্ড, পৃষ্ঠা ২৩৯-২৪১)।

কপুরখলার আহ্মদী মসজিদ অন্যরা দখল করে নেয়। জজ সিদ্ধান্ত নিয়েছিলেন রায় আহ্মদীদের বিরুদ্ধে দেবেন। জামাতের লোকদের ভীত দেখে হযরত মসীহে মাওউদ (আঃ) সন্তুনা দিতে গিয়ে তাদের বলেন, ভীত হয়ো না। আমি যদি সত্য হয়ে থাকি তাহলে এ মসজিদ তোমাদেরই থাকবে। তিনি (আঃ) দোয়া করলেন। আর আল্লাহুতাআলা অসাধারণ অবস্থায় মসজিদ আহ্মদীদের দিয়ে দেন। প্রথম জজ হঠাৎ মারা যান এবং নতুন জজ আহ্মদীদের পক্ষে রায় দিয়ে দেন (সীরাতুল

মাহ্দী, কাদিয়ানে মুদ্রিত, ১৯০৩, প্রথম খন্ড, পৃষ্ঠা ৬৪)।

মাওলানা রহমত আলী সাহেব (রহঃ)-এর ঘটনাও খুবই মশহুর এবং বিখ্যাত। ইন্দোনেশিয়াতে তাঁর কাঠের বাড়ির কাছে আশুন লেগে গিয়েছিলো। এ ভয় ছিলো তাঁর কাঠের ঘর আশুন ভস্মীভূত না করে দেয়। তিনি মু'মিনসুলভ ধৈর্য্য সহকারে সেখানে রয়ে গেলেন এবং দোয়া করতে করতে লোকদের বল্লেন, এ আশুন আমার ও আমার ঘরের কোন ক্ষতি করতে পারবে না। কেননা, আমি সেই মসীহুর নগণ্য দাস যাঁকে খোদাতাআলা প্রতিশ্রুতি দিয়েছিলেন, আশুন দিয়ে আমাদের ভয় দেখাবে না। আশুন আমাদের গোলাম এবং গোলামদেরও গোলাম। আল্লাহুতাআলার শক্তির মহিমা দেখুন, হঠাৎ মেঘ উঠলো এবং মুষলধারে বৃষ্টি আশুন নিভিয়ে দিলো। পৃথিবী দেখলো, প্রকৃতই সেই আশুন যুগের মসীহের গোলামেরও গোলামে পরিণত হলো! (হুদয়গ্রাহী স্মারক, মৌলভী মুহাম্মদ সিদ্দীক অমৃতসরী, পৃষ্ঠা ৬৪, ১৯৩৮ সনের ৯ ডিসেম্বর তারিখের আল্ ফযলের বরাতে)।

হযরত মুফতী মুহাম্মদ সাদেক সাহেব (রাঃ) ১৯১৭ সনে ইংল্যান্ড যাওয়ার জন্যে রওয়ানা হলেন। বিশ্বযুদ্ধের কারণে সমুদ্র পথে ভ্রমণ বিপজ্জনক ছিলো। পথে জাহাজের ক্যাপ্টেন ঘোষণা করলেন, আমাদের জাহাজ জার্মানী জাহাজের লক্ষ্যস্থলে পরিণত হয়েছে। বলা যায় না কখন যে তাদের আক্রমণে জাহাজ ডুবে যায়। যাত্রীরা এটা শুনে খুবই ভীত হলো। মুফতী সাহেব অনেক দরদ দিয়ে দোয়া করলেন। রাতে স্বপ্নে তিনি এক ফিরিশ্তাকে এটা বলতে শুনলেন, সাদেক! দৃঢ়বিশ্বাস রাখো এ জাহাজ নিরাপদে পৌঁছে যাবে। তিনি তখনই এ সুসংবাদ যাত্রীদের শুনিয়ে দেন। অবস্থা খুবই সঙ্কটাপন্ন ছিলো। আশেপাশের জাহাজ ধ্বংস হচ্ছিল। এগুলোর কাঠ সমুদ্রে ভাসতে দেখা যাচ্ছিল। কিন্তু মুফতী সাহেবের জাহাজ নিরাপদে গন্তব্যস্থলে পৌঁছে গেলো (সাদেক বিতী, প্রথম ছাপা, মুশতাক আসগর লক্ষ্মীভী, পৃষ্ঠা ২১-২২)।

হযরত মাওলানা গোলাম রসূল রাজেকী সাহেব (রাঃ) এক তবলীগী জলসার জন্যে ভাগলপুর গিয়েছিলেন। হঠাৎ কাল বৈশাখীর সূচনা হলো এবং বড় বড় বৃষ্টির ফোঁটা পড়তে লাগলো। জলসা বিনষ্ট হওয়ার প্রেক্ষাপটে তিনি খুবই কাতর হয়ে দোয়া করলেন। দেখতে দেখতেই পূর্বাকাশ পরিষ্কার হয়ে গেল এবং সফলতার সাথে জলসা অনুষ্ঠিত হলো। (হায়াতে কুদসী, ছাপা ১৯৫৪ হায়দ্রাবাদ, দাক্ষিণাত্য, পৃষ্ঠা ২৫-২৬)।

মাওলানা নাযীর আহম্মদ মুবাম্বের সাহেব ঘানায় ছিলেন। বিরুদ্ধবাদীরা অনেক কথা বানিয়ে বানিয়ে বলতো। তারা বলতো, প্রকৃতই যদি ইমাম মাহ্দী এসেই থাকেন তাহলে ভূমিকম্প হওয়া অবশ্যিক। যদিও এটা সত্যতার কোন মাপকাঠি ছিল না বা এমন কোন ভবিষ্যদ্বাণীও ছিল না। কিন্তু তাঁর মিনতিপূর্ণ দোয়ায় এ আবেদন করা হয়, হে সর্বশক্তিমান ও শক্তিশালী খোদা! তুমি নিজ শক্তির মহিমা ও আশ্চর্য লীলা দেখাও। সত্য খোদার শক্তির মহিমা দেখুন, কয়েকদিনের মধ্যে গোটা ঘানার ভূমি প্রচন্ড ভূমিকম্পে আক্রান্ত হয় আর এটা অনেক লোকের হেদায়াতের কারণ হয় (রুহ পরওয়ার ইয়াদে, পৃষ্ঠা ৭৭-৭৯)।

মুমূর্ষু রুগীদের আরোগ্য লাভ, দুঃখকষ্ট দূর করা, ক্ষতি থেকে সুরক্ষা আর দোয়ার ফলে অসাধারণ সাহায্য সমর্থনের ঘটনাবলী এতই যে, গণনাভীত। এত ঘটনা দেখা ও শনার পর বিশ্বাস আনা কঠিন কাজ নয়। এসব জীবন্ত খোদার জীবন্ত নিদর্শনাবলী আহম্মদীয়াতের বিশ্বে বৃষ্টির বিন্দুর ন্যায় প্রত্যেক স্থানে অবতীর্ণ হচ্ছে। দোয়ার কবুলিয়তের এ তত্ত্বজ্ঞান আহম্মদীয়াত বিশ্বকে দিয়েছে। এসব ঘটনার ফলে যে স্বাদ ও ঈমানবর্ধক অবস্থা আহম্মদীদের ভাগ্যে জুটে তা অন্যান্যদের ভাগ্যে জুটে না।

## শেষ কথা

এসব সম্পদই আহম্মদীয়াত বিশ্বকে দিয়েছে। এসব আধ্যাত্মিক পুরস্কার ও কল্যাণই আহম্মদীয়াত বিশ্বকে দিয়েছে। প্রেমাস্পদ ও স্থায়িত্বের শরবত এবং স্থায়িত্বের পানীয়-এর এ সুমিষ্ট পাত্রই আহম্মদীয়াত চারিদিকে বন্টন করেছে। হে আহম্মদীয়াতের বীরগণ! আজ তোমরা এসব পুরস্কারের বিশ্বস্ত রক্ষক। এসব আমানত খুবই সততার সাথে পালন করো। ধ্বংসপ্রায় ও শুকিয়ে যাওয়া মানবতার জন্যে আরোগ্যপাত্র আজ তোমাদের হাতে দেওয়া হয়েছে। বিশ্ব নৈতিক মৃত্যুর গহ্বরের কাছে দন্ডায়মান। মানব সন্তানকে গোলামানে মুহাম্মদ অর্থাৎ মুহাম্মদ সল্লাল্লাহু আলায়হে ওয়া সাল্লামের দাসেরা ছাড়া আজ আর কেউ রক্ষা করতে পারে না। অতএব হে দু'জগতের করণার বিশ্বস্ত দাসেরা! উঠ, আর অন্ধকার ঘনঘটা পূর্ণ পথসমূহে বিভ্রান্ত মানবতার জন্যে নিজেদের দেহ, মন, ধন সব কিছু বিলিয়ে দাও। নিজেদের দরদভরা দোয়ায় এর ভাগ্যকে জাগিয়ে তোল। সারা মানবতার জন্যে করণার মুষল ধারা বৃষ্টিতে

পরিণত হয়ে যাও!

কিন্তু স্মরণ রাখ, বিশ্বকে দেবার আগে এটা অবশ্যকর্তব্য তোমরা স্বয়ং এসব কল্যাণ, পুরস্কার ও আশিসে নিজেদের অন্তরকে জ্যোতির্ময় করো যেন এসব আধ্যাত্মিক ভান্ডার অন্যদের কাছে পৌঁছানোর অধিকারী হতে পারো। এখন এ আমানতের দায়িত্বভার তোমাদের ক্ষেপে ন্যস্ত। কাওসারের মালিক মুহাম্মদ সল্লাল্লাহু আলায়হে ওয়া সাল্লামের তোমরা গোলাম ও দাস। এ সম্মানের মর্যাদা রক্ষার্থে এসব ভান্ডার বিশ্বের কোণে কোণে পৌঁছাতে থাকো যেন এসব সম্পদ, পুরস্কার ও কল্যাণ কখনও শেষ না হয়ে যায়। স্মরণ রেখো, এসব কল্যাণের বদৌলতে বিশ্বের ভাগ্যের পরিবর্তন আসবে আর বিশ্ব একদিন অবশ্যই মানবতার অনুগ্রহকর্তা হযরত মুহাম্মদ মুস্তাফা সল্লাল্লাহু আলায়হে ওয়া সাল্লাম-এর দাসত্বে এসে সব দুঃখ থেকে মুক্তি লাভ করবে। আজ এ সেবার সৌভাগ্য তোমাদের লাভ হয়েছে। জীবন পাত করে এ কর্তব্য পালন করো যেন আমাদের প্রভু সন্তুষ্ট হয়ে আমাদের নিজের করুণার আঁচলে ঢেকে নেন। আল্লাহ করুন, যেন এ সৌভাগ্য ও সন্তুষ্টি আমাদের সকলের ভাগ্যে জুটে। আমীন ইয়া আর হামার রাহেমীন (তা-ই যেন হয় হে শ্রেষ্ঠ করুণাকারী)।

(দৈনিক আল্ ফযল ইন্টারন্যাশনালের ২৮-১১-২০০৩ এবং ১২-১২-২০০৩ তারিখের সংখ্যার সৌজন্যে)।

সমাপ্ত